


元許文忠公至正集

柳田文庫

文庫11

D 93

7





文庫11  
D 73  
7

- 273  
- 7

010190548916



元湯陰許文忠有壬著

碑志五

劉平章神道碑

功臣國有史家有傳墓碑有銘史則在公惟傳若銘志必是重托  
 必其可修名偉績用底不泯焉有壬在少時知湖廣平章青社劉  
 公已習晚識其子四川平章而不知公墓碑之未銘也四川薨其  
 弟為湖廣行省參知政事始奉家傳請銘有壬以公名績如彼而  
 託非其可辭叅政請益切辭既不獲且夙嘗不揆不可而喜銘偉  
 人乃覈其傳而筆之公諱國傑字國寶系出女真烏古倫氏歸我  
 更姓劉氏曾祖諱延心金樞密使妣蒲蔡氏祖諱鎬金蔡息陳頴  
 路都統妣徒丹氏考諱德寧益都路軍民達魯花赤青難治且新  
 造疑畏為設條約郡以治聞進龍虎衛上將軍卒官妣奧里氏子





四人國秀國材皆居遼東國華早卒公其季也幼嬉即為行陣生  
作狀工騎射從攻連海有功擢隊長至元己巳天兵南下為新軍  
千戶宋保障襄樊公屯萬山堡敵偵不備突至堡兵才數百公結  
陣直趨眾因乘之斬首四千餘級主帥嘉之賞白金百兩攝萬戶  
略地荆峽深入轉戰俘生口萬餘賞白金如初數復戰城下多俘  
斬賞白金如初之半土城為藩蔽最堅作雲梯先登裹創力戰拔  
之錫金符階武畧將軍敵圍久食盡張順等潛運以入公勒戰艦  
邀其歸路鏖戰五十望禽順樊城夾漢水潛杙其中盡拔出之毀  
其南柵湮其隍坎墉以登拔之俄拔樊城戰尤力呂文煥降甲戌  
奉詔入覲賜白金百兩錦袍弓矢鞍勒進武德將軍佩金虎符管  
軍總管我師次郢宋壁黃家原堡公以三百人徑奪之郢將趙文  
義襲我反擊走之文義敗死斬首七百餘級進武節將軍沙洋新

城皆扼塞地先以五十艘退沙洋守兵進攻新城三晝夜乃拔賞  
白金二百五十兩我師自陽羅堡畢渡孫虎臣拒於丁家洲公以  
選鋒當前其眾自潰逐北至蕪湖始擢萬戶是後累功賞白金至  
千兩惟揚之役詔壁揚子橋張都統率萬人夜寇備嚴莫能入遲  
明追擊禽之賜名霸都國語驍勇稱也丙子惟揚守帥李庭芝道  
公帥所部追至泰州斬首千餘級獲之江淮平進懷遠大將軍入  
覲賜白金千兩錦袍弓矢鞍勒授命書四川行樞密院事將行北  
有警制命公曰征者不力以其族屬懷顧望爾卿號陳力朕視卿  
如子當如朕躬行也行而敵逃適遷鎮國上將軍漢軍都元帥賜  
錦袍玉帶弓矢鞍轡楮幣中統五千緡俾戍青社戊寅徵詣上京  
統侍衛軍萬人北征慰託甚至公頓首曰臣粗習兵事惟血衷可  
以報國有功諸將力也萬一蹉跌臣自當之 上為嗟嘆師次



益圖大雪環車為柵穴地與士卒同卧起脫脫木犯塞輕騎襲破之樞密同知別迭迷失分道追敵敵已潰慮糧盡過伏委輜重南奔為收其散亡而歸戍稱海開屯田進輔國上將軍壬午召赴京師上欲復討日本公語稱旨授征東行省左丞練士治械於惟揚聞盜黃華嘯聚十萬江浙為震詔公以征東士馬會捕直趨赤崖砦斬黃華繫其老弱購其餘黨同官語公不盡誅無以懲公曰黃華就戮誑誤已多况脅從乎彼方仰我生育忍更殺之但致期使自新足矣衆果自降初朝議恐賊不制發蒙古軍三萬濟討所過蕩然移文止之閩民德焉征東省罷改僉書江淮又改四川俄復江淮征東省復仍為左丞詣闕上方畧還惟揚征東省又罷仍僉樞江淮東南賊未殄有詔一以委公改湖廣行省左丞湖南李萬一怙險莫制置郵為絕乘銳平之丁亥駐桂林治交趾軍興

回會獠出剽急擣其柵禽之詹一仔等寇衡永實武張甚徵諸路兵慮饋輸不繼作屯於衡曰清化永曰烏府武岡曰白倉未半歲皆自歸江西盜逾境會江西行院投蕭獠於陽山平懷集逋寇已丑廣東盜出沒搯其吭夷其柵焚其積聚殲其首閩曾廖蕭嚴擊山刊路搜括殆盡樞臣請屯官符上曰卿等忘劉二霸都邪對曰劉已授上曰前已酌功今授俾延於世遣使持符即軍中佩之陳獠犯道連境遞擊之殺賊過半江西盜復逾境犯郴窮追獠之士人訟弊遵賊為惡得其狀皆戮之龍泉獠圍禾源下令往捕或謂賊未逾境不當行公曰休戚一體彼此何別且賊不意吾越境討之乘其不備破之必矣簡閱夜赴麾騎兵進步兵從之賊大敗奪所掠子女二百人還其家禾源窘已數日軍忽至民疑為神皆焚香泣拜俘賊言南安鍾獠將出剽分兵猝至其巢獠衆錯愕自



蹈籍奔潰萬戶劉兵至賊已平矣出橐中白金以犒將士旋軍桂東遼破鄴縣大肆焚掠走壁龍泉分兵三路公由中徒步援蘿磴險抵其巢柵勦之擇鄴要地置軍以戍永賊李末子七千殺其監郡忽魯公知賊素易官軍示以閒暇抗其出路俾無所掠逃無所之乃與降酋分道而進禽而斬之辛卯遷資德大夫湖廣行尚書省右丞廣東遼復叛聞公行皆自破散復湖廣行院公為副樞治盜春陵盜又遁監郡貪虐下之理死郡人稱快紀之碑初公屢有功行省權臣抑不以聞至是行院始叙上之賜玉帶一白金五百兩時順德王答刺罕以碩德重望行湖廣平章與公相得嘗謂公曰世間文字惟漢人之學為最惜我不知公曰以公之聰明任賢使能即是讀書使子孫留意經史即公自讀也王嘉納焉癸巳秋入覲上悅其來曰湖廣地重卿宣力多漢人每以老避事

國人則不然日明身健即謂不老卿亦未老將委卿大事卿還避否公對曰臣死而後已不敢避也上曰成哇既得復失卿盍為朕一行對曰成哇指末物交趾掌中物也臣願為陛下取之上曰此事猶養在心豈諸人爬搔所及卿言乃深合我意議典軍十萬公對曰十萬大費只須萬人上曰十萬多一萬少以番兵五萬付卿公請近臣為監上初不許以示專任請不已乃令自擇時親王亦乞刺互在側公以請許之授榮祿大夫安南行省平章政事賜錦衣一襲期諸軍會桂林甲午春朝廷有大故師遂寢成宗皇帝即位命公為湖廣行院副樞分院衡陽以過嶺管江西賊犯收州公擣大溪山四向捕斬賊為屏息施容羣蠻畔辰澧民不得耕畜地蓋於獠所巢雜以猫獠數郡騷動公以土酋攻之有功者仍出橐中銀幣為賞應時破滅先是蠻恃山谷而吾士素弱



公乃先涉危徑刊木闢路師行千里不楹於險渠魁田知州孟十  
戶撒大王之屬皆就戮元貞乙未行院罷公為湖廣行省平章五  
溪郡縣唐宋以土丁捍蔽廢久賊遂肆公復之民賴以安又以道  
柳衙桂茶陵接諸獠擇要地樹砦柵廿八以扼之入覲賜王帶錦  
衣弓矢鞍勒御史臺奏出楮幣四萬緡以酌私犒之費上思州知  
州黃聖許叛命公討之身先士卒突其陣賊殊死鬪張兩翼馳之  
賊敗逃象山山界交趾多巨象獐獸林菁蒙密公料地樹柵亘數  
百里諸將分道入擒殺殆盡聖許逃安南撫其脅從徙慶遠郡不  
能自食之民耕其隙地為五屯因以為防奏上報可召入賜錦袍  
玕帽弓矢鞍勒上廐馬自是威讐南土矣大德辛丑召至上京灤  
水泛溢公董疏導之役和林有警命公出師將行會鬼國酋折節  
暨獠宋隆濟叛初右丞劉深言西南夷有所謂八百媳婦者沃壤

多產可取朝廷信其言命之出師湖南北轉輸十不致一民為竭  
產役夫死者相枕藉折節乃渠帥阿那婁健黠而能兵師過其境  
不堪蹂躪遂叛遮深兵圍貴州朝廷患之亟命公往蒙古侍衛親  
軍都指揮使也先忽都魯副之雲南四川兵若深所統皆隸節制  
師次巴陵賊犯貴州急深敗績倍道赴之明年雲南又數告急諸  
將議進止公謂蠻恃土產馬謂北馬不能險吾士馬既習其險易  
諳其變詐使賊不知為計不憂不捷健次播州與四川汪帥兵合  
賊十萬且及境令諸軍畢入賊地分部攻擊蠻勢為沮時師行四  
千里天向暑糧且匱有旨須秋涼進發頓思播之境列營守禦申  
規約習戰射九日滇蜀軍二萬人烏蒙芒部公所統三萬及思播  
兵萬人與元帥海刺孫也先忽都魯分三道進公從中道節制諸  
軍賊所至為柵盛兵堅甲以拒公以客軍遠聞非身先之無以作



士氣崖徑斗絕即徒步雜士卒攀木而登遇其要害蕩滅無餘選射士列前發無不殪或設伏或縱擊奇謀聞出出橐中白金為賞四十餘戰皆捷賊或降或匿且招且捕喻其首以朝廷威德賊氣已竭以奇兵淹襲轉聞千里抵雲南普安路境賊不復能軍癸卯二月己未折節就縛宋隆濟阿女等皆伏誅西南夷遂平召入朝將佐咸許上殿禮遇隆洽賜錦衣二襲玉帶一金鞍勒弓矢楮幣二萬五千緡御史臺又奏公出私幣賞功酌勞銀一千九百一十四兩楮幣萬五千緡二佐偏裨遷賚有差上御嘉禧殿顧公曰平宋至今百戰必勝可謂奇才公奏曰非臣之力諸將之力也詔過家上冢鄉里榮之至武昌疾甚語問疾者曰昔當誓取交趾願死於陣不願效馬伏波裹屍還葬也折節之役今上嘗預令署狀約日平賊否則籍吾家吾幸了此不累子孫但恨不

世皇榻前

能取交趾以報

世皇為終天之恨爾歲乙巳二月乙未薨公

生甲午壽七十有二贈推忠定遠效力功臣光祿大夫湖廣等處行中書省平章政事大司徒上柱國齊國公謚武宣先塋在遼東秦州普一路不知其世次矣公之考妣以至元己卯正月合葬於益都縣東北麻家營洱河之陽有翰林侍講學士閻復所撰碑公附焉娶曹氏早卒繼李氏次姜氏王氏子三人曰脫歡榮祿大夫四川平章也次某早卒次脫出今參政女若干適某孫男若干女若干曾孫男女若干至元初國家將囊括四海勝國岸然東南文恬武嬉勢不能不亡也及誘我叛臣繫我行人則其罪盈矣大聖御極順天應人大將一出江淮版圖固已在吾職方氏几上矣亦惟一時將帥之得人偏裨之用命際興王之運而各有樹立焉公以雄毅之姿奮身戎行其樹立亦茂矣哉天下甫定如大病



始愈必有餘疾此才已而彼又見人或易之亦有能斃其身者江南之既平也閩中江西湖南黔中之諸盜廣東西之諸獠足以鼓動一時魚肉吾民是雖餘疾非良醫未易治也公乃獨任其責或獮獲難或招徠而威名所及莫不斂迹南北萬里始終百戰可謂多矣最後小人啟讐於承平之時敗軍亡將於小醜之手至糜爛汗漫不可枚舉矣而又以屬公公年七十矣乃能奮不顧身以刷國恥此又收功而尤偉者也其怏怏骨志以逝者獨有未取交趾爾是蓋有非人力之所能為者世以為公之恨而亦以為公之幸焉公之薨三十五年獠獠之發不知其幾朝廷議將每難其人坐糜供億服未旋踵檄報又至則如公者其益可思也哉銘曰  
金源澤竭望族俱堙逝矣東土孰豐厥屯薪傳不熄泉流有泐海岱鍾奇偉人奮出王師吊伐適逢其時結髮行陣死生以之萬山

之役以寡勝衆錐穎既脫威名日重苦同在下勞為士先乘梯於雲拔棧於淵墜壁摧鐵飛舟越空我惟不出出乃即功闕牆有警警於先聲茫茫稱海沃壤可耕大風始息餘波猶蕩頑民弄兵有戮有放五溪阻幽嶺嶠險邃虺蜮起伏亦恃其地僕僕掃除甫東又西有聞即行孰立矜畦伏波矍鑠自視未憊吾忘吾身馬革何待嗟嗟小人談笑開邊乃血我師俾流為川不有此翁揮戈白首西南之夷幾非我有天恩優渥下編將士玉帶錦衣照耀桑梓歸來林下不煩綏復匪公之志亦公之福瞻茲洱陽百世其昌我誌公功於戲不忘



碑志六

有元功臣曹南忠宣王祠堂碑

至正元年二月己酉中書臣僚言勅建曹南王阿剌罕祠禮部議  
 視淮安忠武王而祠於集慶縣官給其費且請賜田千畝以奉祭  
 祀制曰可既月王之子脫歡由中書平章政事拜御史大夫行臺  
 江南臺治集慶又得躬相厥役以迄於成貽書有壬曰子嘗承詔  
 銘先生知先生莫如子祠落矣願有紀也讓不可乃本其碑擷其  
 家世履歷勲庸之槩曰蒙古札剌兒氏有贈定威佐運功臣光祿  
 大夫司徒謚忠定諱撥撒者王祖也贈宣忠靖遠佐運功臣金紫  
 光祿大夫中書右丞相謚桓毅諱也柳干者王考也勲皆上柱國  
 爵皆曹南王身皆死於戰有大功祖妣塔拜妣滅列皆封王夫人



此其家世王沉毅善戰襄桓毅職中統四年錫銀章虎節仍上萬戶至元十二年擢昭毅大將軍以上萬戶權行中書省事進中奉大夫行中書省參知政事明年以參知政事行江東道宣慰使明年入覲陞資善大夫行中書省左丞十六年進資德大夫行中書省右丞仍宣慰江東十八年入覲拜中書左丞相行中書省事階光祿大夫征日本次明州而薨壽四十九葬曹州濟陰縣郭屯累贈推誠宣力定遠佐運功臣太師開府儀同三司上柱國追封曹南王謚忠宣此其履歷歲己未渡江破宋師於隆興北山中統初討阿蓋斛兒渾都海於河西明年扈征阿里不哥於幕北明年從宗王平李壇於濟南四役皆有奇功賜黃金龍金鞍文錦恩數稠疊至元四年觀兵襄陽明年圍之越六年克之始走宋師安陽難中繼宋師百丈山卒與策勳焉十一年畧地江北奪穎南門堡

獻盪舟之策渡沙蕪取鄂州泝江陵至鎮江十二年與淮安忠武王右丞相伯顏分道取宋王發建康道與宋師戰屢敗之破東壩砦拔漂陽建平廣德西安長興關獨松關前後斬首一萬五千級殺其將杜總管吳奉使許吳二總制及騎將二人俘谷總制張知府裨將祝亮等四十二人十三年三軍會於杭宋亡徇浙東降趙提刑等五百餘人追播福安僵尸四十里殺步帥李世達俘秀王與擇監軍趙由懜防禦使林德降安撫使王吉分軍興化擒宋相陳文龍降宋官二百餘人淮兵三千人江南遂平此其勲庸配脫端閣閣倫忽都臺並封王夫人子男二長也速迭兒銀青榮祿大夫山東河北蒙古軍大都督集賢大學士次大夫也女五俱適望有壬惟古者功臣受封之國先建宗廟於路寢之東所以廣孝而勸忠也諸侯之制二昭二穆與太祖之廟而五太祖百世不遷昭



穆則視親盡而遞遷之自漢以來諸侯鮮及十世身享崇爵而子孫不能保也廟制由是而弗講矣其有德及生民功施社稷者在朝廷則有圖形以寓其思賢念功之意在其臣吏則有建祠以盡其事止如存之心亦因時制宜之義也諸葛武侯之沒所在求為立廟又請立之成都後主皆不聽民至私祭陌上以武侯之功尚何靳於一廟豈欲黜私祭以崇正祀耶夫所在立廟在禮若況立之成都亦復不聽何哉至習隆向充之請始聽立廟沔陽則武侯之得廟亦戛戛乎其難哉 皇上於忠宣既立之廟又錫之田思賢念功之盛德豈區區蜀禪所能知哉大夫祇順德意克篤前徽勸孝勸忠於是乎在皆可歌以薦者也乃為之詩俾歌以徹豆邊其辭曰

乾元統天乘六龍宏材碩德如雲從忠宣天挺間世雄父菑子播

昏作農 帝曰來汝汝世忠奮戈無往不奏功方城額額睽皇風分兵掎角乘其墉沙蕪飛渡星月蒙順流霆擊無遺鋒義旗禮干趨獨松趙孤銜璧吳山空萬邦玉帛四海同台司兩轄昭報功虎符龍節行江東倭奴何物勞蒙衝魂升海隅心九重揚顯有子能始終哀榮典冊備且隆袞裳旒冕曹南封石頭城高江流潑新廟奕奕摩蒼穹圭田千畝畝且鍾維縻維芑紛糝種春揄釋烝簋有饌醇醲載裸牲特豐脩樂舞兮明禮容神保假兮福攸降象賢濟美垂無窮

大元贈光祿大夫江浙等處行中書省平章政事柱國追封趙國公阿塔海牙公神道碑銘并序

江南行臺御史大夫阿思蘭海牙致政家居遺其子都水少監悅歡奉家乘請曰老夫賴先世餘澤竊祿位有年而吾父平章公墓



尚未表非慢也顧盛滿難居功名解終恒懼不克負荷遺羞邱壠君恩如天幸賜骸骨養病田里年且八袞吾知免夫子知我其銘之有壬讓不獲本其狀序曰平章公諱阿塔海牙畏吾爾氏世為高昌望族祖玉龍阿思蘭都大都大華言巨室也贈中奉大夫河南江北等處行中書省參知政事護軍范陽郡公祖妣月禿堅追封范陽郡夫人考諱哈刺阿思蘭都大當 太祖皇帝肇造區宇國主邑都護發兵攻金斬其長吏聞滅乞里有異遣將命偕察魯四人馳告行在且具歎誠 上曰果如爾言其告爾主以方物來對曰 皇帝幸生活高昌高昌身且不敢有何有方物復命輦寶貨金織段以獻由是高昌內附因留宿衛從 太祖南征卒於柳城贈資善大夫湖廣等處行中書省右丞上護軍范陽郡公妣燕帖你追封范陽郡夫人公宿衛積勞除塔山屯田打捕

提舉不就卒於京師昭回里第年七十一葬城西小南莊之原贈光祿大夫江浙等處行中書省平章政事柱國趙國公配八剌忽都哈封柳城郡太夫人卒於濟南年八十四大夫時常憲山東護樞歸附子男二長大夫也次賽因海牙同僉宣徽院事早卒嗚呼世臣大家上有啟而下有承得以世濟其美者公一門其庶幾乎公性恂恂而志趨趨詣由近侍出官非其志也嘗曰我先人有大造於高昌氏子孫必有與我不必為也夫以右丞之賢明畏天之義一介往來舉危亡之國而措之安遇知 太祖天苟引年居高位享厚祿必矣乃鬱而不發蓄而不泄至公又植而不食必再世而後顯是蓋遲速之有時非人力之所能及而啟之於前者固已逢涌而不可遏公平時大夫已拜南臺御史流澤之來浩乎其沛然矣其浮雲富貴優游以老宜哉大夫以卓越之才起家監縣



為良吏入臺為材御史出廉諸道為剛明使者入中書分南臺為  
天子重臣歷九朝官二十七轉天下識與不識皆知其名而  
又躬服儉素衣無錦繡居無華飾榮寵方至退然若虛 文皇  
嗣位聖眷益隆玉帶上尊賜賚相望至為玉刻署押以示殊遇當  
是時苟假寵於上為先世要美謚作豐碑亦何求不得顧乃自抑  
若不能加於其先有於其身者必遲回以待於致事又遲回以至  
於今日不請於上不謁於太常擇所宜為者自為之視世之朝暴  
貴而夕斲賜碑者有間矣二子長少監也次月祿海牙少監二子  
寶哥寶山俱宿衛內廷公生世為賢子為賢父歿而享其寵嘉出  
於尋常身大官無聞者萬萬也其可銘也夫銘曰  
於維趙國作德於逸而小心以繹不柔以枝不競以亟以承其先  
烈以裕其亂息其先伊誰實為右丞子子其征屬屬其盈高昌之

望曰命靡常主命不辱而天威肅將輦其金瓯匪厥元黃歸我聖  
皇以救寧一方大夫繩武不遠伊邇右丞有孫趙國有子坦坦如  
砥矯矯如矢維 天子使靡不極所止宜爾錫爾山峙川委繫  
來世之祉城西之原有樹有封刻銘豐碑百世可宗

大元故翰林學士資善大夫知制誥同修國史贈推忠守正  
亮節功臣資政大夫河南江北等處行中書省左丞上護軍  
追封魏郡公謚文肅暢公神道碑銘

泰定丙寅翰林學士資善大夫知制誥同修國史暢公薨十年兵  
制贈資政大夫河南江北等處行中書省左丞上護軍追封魏郡  
公謚文肅又十年加贈推忠守正亮節功臣官勳如故伯子江東  
道廉訪副使篤將修居之賜灼公之善範後之承也諡其友許有  
壬叙而銘之碑叙曰公諱師文字純甫上世居汴公生洛陽大夫



淵贈中順大夫上騎都尉魏郡伯配田氏贈魏郡太君父訥泰汴  
侯幕一府服其賢注地理指掌圖有詩名公勇警悟貧無書手抄  
口誦甫十五博覽經史弱冠謁魯齋許先生先生賓遇之高弟若  
姚公端甫高公道凝皆相推友善中原底定慨然有志於世上時  
政十六策受知丞相安童補右三部令史丞相伯顏南征選為省  
掾從攻揚州常州下蘇秀臨安歸裝獨載書籍無一長物編平宋  
實跡上之初官承事郎行樞密都事重慶叛竭謀畫諾諸城相率  
內附安西王承制改四川北道宣慰司經歷尋除承直郎潼川路  
治中拔寒畯王朝綱王伯寧韓伯昌為府史後皆至達官修府治  
發地得白金五十錠同僚分公十錠公獨不受以修府學傳舍餘  
作酒器給公用承制改同知保寧路事治高平簡反側以安擢僉  
四川道提刑按察司事

世皇知其賢詔所至毋敢阻撓給三

傳赴上至則擿姦雪冤興學除弊風采一變有旨若曰暢純甫不  
貪佳士也其令與臺臣玉速帖木兒為侶遂拜監察御史糾劾權  
貴憲綱肅然上所纂農書遷陝西漢中道巡行勸農副使置義倉  
教栽植闢荒田農事以興俄僉陝西道按察司事時按察改廉訪  
司精汰舊官獨副使盧公處道暨公仍舊興元監軍怙勢肆虐得  
其贓奏決之移僉山南道枝江歲防水役衆往返四百里供給尤  
苦公以江水安流悉罷其役亦都護駙馬之徒太為民害繩其尤  
者流之改僉山東道入為國子司業教育有規諸生服焉除陝西  
行省理問始至決滯訟三百餘事若右丞圖滿送屯之訟宗宣  
使鞏士安之箠折民齒開成同知張德昭之利女財而奪之歸皆  
強悍有恃官不能制者併寘於法引疾歸遷太常少卿翰林侍讀  
學士知制誥同修國史

成宗賓天

武宗撫軍胡方仁宗



淵潛覃懷而中宮屬意安西宰相知其不可乃集館閣議以察向背公與焉即颺言曰此宗社重事詎宜苟且衆皆默然又曰余病矣請歸調治遂拂衣而起仁宗入京始出視事草至大改元詔修成宗實錄賜中統楮幣為定一百加少中大夫請郡除太平路總管兼勸農事歲旱當禱公曰聞先旱必哀於民天可欺乎乃捐俸致禱不日沾足當塗民生殺牛祈雨囚械者六十餘人公惻然曰雨暘衍期守令責也民殺牛致雨爾縱不愧於心尚忍聽其訟乎即破械出之舟有汴流觸公流之舟致溺其人累謝不能決公亦縱之吏持不可上其議憲司卒是公議秩米收積盈屋公曰吾家人能盡此乎呼寒士小民恣其取去分憲至郡必謁公曰公治內無事此來行故事爾至屬邑曰暢先生治內何敢久留後守為之立祠於學召為翰林侍讀學士階中奉大夫奉勅撰王

勅成道記序等文賜白金兩錠不受尋除燕南河北道肅政廉訪使視事五月歸中書遣編修官李木魯翀奉翰林學士之命以請起至汴以疾歸延祐四年丁巳秋主河南鄉試歸次襄縣西顧長安發邱壘之歎因感疾十月朔薨於縣之傳舍某年某月某日葬於襄陽峴山之原配移刺氏上世遼貴族佩金虎符萬戶某之女先公二十年卒兩封魏郡夫人三子長篤也廢淮安路判官轉將作院經歷拜西臺御史移南臺陞都事除江浙省員外郎改僉山東道廉訪司事入為監察御史階大中大夫為令官娶李氏子六人勉國子上舍生年二十七卒勤勅勸勸皆幼女五人次曰騫不仕娶成氏子勛女一人次曰駿娶蒙古氏子四人勳助勝為駿魏郡夫人生騫曹氏出也至元之初際興王之運得賢為盛而文學之士措諸有政拔出流俗籍甚在世若魏公者混一未可數



也公制行孤潔足以俯視一世立志高遠足以上追古人天下之人莫不驚嘆以為異人而不知者造訕騰議公亦不恤也若夫從南征而垂索歸得地藏而用諸官屢辭上賜盡揮祿入雖公小節而其冒次為何如哉高公彥敬為山南副使移文言不可居公上者三謂公官五品先十餘年不可犯積薪之誚渡江孰不富貴至今家僅數口寒士無異勢利無一動其心高節清風殆不可及且兄事三十年義雖朋友愛如同生一旦岸然其上實不自安犯此三不義何以糾人之非即日辭去觀此則當時俗化之美士大夫風節之高公之所以致此者可知已朝為侍吏幕徵倖躐數級傲然為長吏為同列者聞二公之風亦可少愧哉公作守得古循吏體執憲有古遺直風至於立朝抗論不恤利害則其較著者也其為直專館閣倫顧問而中外十轉始為國子司業又出為陝西理

問入翰林才一轉官尋又出守再除翰林則老矣豈一時人才之多耶抑當時名爵之重雖如公者亦若是而已耶一技一能與不能搽觚而專局至通貴未止者則又有命也耶然而列聖知遇多士推服太史有錄太常有謚加贈有號而又承家有子則天之於公亦厚矣讀書一過目即不忘假友人宋長編不決日反之友訝其易公曰予舊熟之有忘者申之耳友記僻事數十驗之應答如響為文力追古作盧公處道以為似太史公而姚公端甫亦稱純甫實善文著述多而不存橐副使所稗才十一爾其見於世者不專於文也銘曰

魏公之出際時勃興挾策見世淵儲遂騰采木斯拔蜀蔓有芳爾牘既資贊益惟宏陶之不掬撫之不桓以隄厥潰以撤厥棚壁求簡編土視金繒皇皇使車爰七其乘善則爾揚愆乃爾繩學政聿



修郡積載凝掌帝之制適天之臺大議不屈長江可溯名日山重  
家不縷增歸來自樂飲水曲肱有介如石有潔如冰峻如絕壁孤  
如秋鷹弛張翫世中別淄澠夷考其行不渝九微聞公之風貪懦  
自懲宰木已拱恩光日昇漢江茫洋峴首峻嶒元凱多事慮及谷  
陵惟德惟神有儼威稜景而前修昌而後承登世於千物莫我敢  
較

至正集卷第四十九終

至正集卷第五十

碑志七

河間路重修孔子廟碑

化民以學校承流以牧守治道之要者也四代庠有上下序有東  
西學有左右東膠虞庠之制雖質文家之不同所以明人倫為民  
極其義一也聖人得位而行其道於天下也則亦以是諄諄誨人  
為千萬世之計焉後之人君不以師道自任而任於人任於人而  
近民者其惟良二千石乎古有之二千石千里之師職在宣美風  
俗夫宣美風俗舍學校何以哉而所謂師者猶師之教弟子循循  
善誘化其質而發其善不務出是而惟獄訟榜笞是務是為師而  
讎其弟子可乎昔蜀有夷風文翁修起學官由是大化閩未知學  
常袞設鄉校風俗一變夫以蜀閩之陋而二公一至翁然丕變况

至正集卷第五十

碑志七

十六



內郡熟先王詩書禮樂之化者乎河間古冀州之域今為甸服大郡總管非馭歷焯於時者不輕畀至元六年庚辰實 皇上復科舉之歲戶部侍郎萬嘉閣出守是郡丁文風中微之會士氣萎蕭弦誦絕響慨然欲振起之相舊孔子廟殿宇卑陋配侑無所於設且堂構百年摧圯不支將撤而新之而施設有序明年為至正辛巳監郡塔卜解耒起家曹館右文其素也故其議克叶刻其事以請朝廷從之仍給楮幣若干俟復倡割其俸以佐不給僚屬和者相屬緡合二萬五千有奇或以歲饑請緩俟曰食可去聖教不可一日廢况民食方棘而興作以資未技亦昔賢救荒之一道也於是市材庀徒傭值有加盛暑躬蒞厥役吏抱牘就咨郡事口醉手署不少怠再踰月而落焉崇加一仞廣視舊增三之二黜堊丹碧不質不華配設有容左右秩秩翼以兩廡繚以周垣崇嚴靚深

妥侑惟稱又為精舍以處師生時課其業諸生相與謀曰完矣美矣微侯廟其圯矣貞石之紀其可以已乎走狀屬記辭不獲則語之曰夫子所謂聖人不得位而不能行其道於天下者也不能行其道於一時而能行其道於千萬世者也尊為天子富有四海宜享宗廟萬世之祀堯之藝祖舜之神宗文武之世室求之禹跡茫茫之中邈乎其不可考也其或廟以某地祠以某時官無常規禮雜不經吾夫子家而闕里國而曹監散而天下郡邑象設有宮藏事有時蓋其立教之功人報之隆與天地相為無窮我朝 列聖致崇極之禮視古有加恪遵垂訓設學重教 皇上方圖治儒術作新士氣宜俟之疲力祇承而不敢緩也新廟奕奕諸生在庭亦有感發而興起者乎聖賢之道具在方冊口誦心維身體力行勿怵於近利勿安於小成窮而獨善人且薰其德達而兼善天下



受其賜使後之人指而稱之曰某河間士某河間士是侯之望於諸生者也諸生其忍蜀閩之不若耶嗚呼侯其自鳴其功者哉春秋書興作重民力僖公修泮宮常事不書然泮水之頌夫子乃存而弗刪豈無意乎則是役也不記焉不可也於是乎書

故承務郎江西等處儒學副提舉葉先生墓碑

承務郎江西等處儒學副提舉致仕葉先生諱端字宗瑞遠祖祖洽宋熙寧間廷對魁天下曾孫廷秀由邵武徙建昌新城春秋擢第官至朝請大夫知梧州言事忤旨仰藥卒子遠宣教郎奉樞歸次采石而溺孫茂祖甫四歲母饒夫人抱以依姑趙趙居而教育之因為金溪人中鄉貢進士舉娶趙生四子先生其叔子也幼尚氣節致力經學以及百家皆得旨要其為舉子業不蹈時習或戒以希有司旨先生曰吾為是區區而悖吾師說乎益篤志為己之

學進士公卒先生甫冠資產悉分弟妹而躬耕以食趙夫人卒兄弟四出先生獨力營治久乃幡然曰昔親在不敢離親亡矣充吾學為揚顯者不力可乎歷甌越會稽瑯琊涉汶泗過洛入秦道晉以達幽朔無所遇最後至遼東世臣洪氏以好儒聞闡義學方難其師有以先生文行言於平章君祥右丞重喜者及見大悅館而師焉諸子彬彬以文學濟其世美遼東之人翕然知向學者先生力也朝廷以右丞薦授遼陽路儒學教授再調大寧路陞將仕郎江州路湖口縣主簿攝尉事盜久逸者皆獲之憲司檄按德化縣疑獄即得其情覈虛糧決滯訟縣以治聞轉撫州樂安務提領俄請老授前官至順二年十一月二十五日以疾終於家壽八十有五 年 月 日葬 處娶趙氏生子順女適孔景仲繼黃氏生子升寧都州夏河寨巡檢女適湖口縣典史杜復亨繼王氏生子



大有廬宜春陽橋務提領女適高安白沙寨巡檢孫鈇柱孫男三人鎮綱繹女三人先生年五十始出卒能致官而行其學迹徧海內乃得返鄉里至於休致而終於正寢雖用不盡其施而教之振於東善之淑於人者多矣遺文四十卷庸學提要六卷周易釋疑十卷於庠博矣哉中原貢舉廢將九十年江南亦四十年有士少時先公教之曰金源分裂且事貢舉國家之大未有不行但遲速有時爾力學以俟當有際也時混一才二十年故老尚多幸及從學粗有得也尋以校職從事山北憲貢舉詔下乃棄而應薦先生實主文遼陽科制廢久內地有所不悉遼陽在東僻有司一切昧於奉行先生纖悉教之蓋江南內附時年已三十餘矣習於場屋條制者也監試憲公田時佐曰微先生幾不能奉詔有士既獲薦又入禮部經問之與策問之切見者莫不賦異先生在湖口方鳴

金鼓行江有士歸省臨江過之中流歡甚至順庚午有士為兩淮轉運使先生惠然肯來年八十四矣飲食起居猶昔也手寫大學中庸二書注字如蠅頭以與小兒留月餘歸明年遂歿又八年升來武昌請銘將刻之阡茲銘也其誰宜為銘曰

於庠先生志一學醇友善行道恥為鄉人昔隘分裂佔畢苟安四海既一我轍乃還有韞未裸賈用不售爾不我知我不爾觀晚慕幼安片帆遠東有命自天臯比畀公俊造賓興墜緒孰繹紹遠選公張此東僻樂育嘉惠侏僂伊吾糾邑司征曷究我書八十五年口不藥劑提身所遺根茂實遂旅無所容道路屏營歸來正首於庠先生

故奉直大夫僉河北河南道肅政廉訪司事贈朝列大夫秘書少監騎都尉高陽郡伯韓公神道碑銘 并序



公諱居仁字從義姓韓氏般陽長山人曾祖而上兵亂譜逸祖諱  
溫配段氏考諱國寶配劉氏三子居貞居中季公也幼耿介年且  
強仕郡守移刺曰舉孝廉二千石事吾封部有人敢默不聞貢之  
司憲緱山陳先生長憲山東熟公為人禮致之行部必以從轉察  
院吏部益自砥礪大德間朝廷勵精圖治處澤不下流而情不上  
達也遣奉使宣撫天下故翰林學士承旨中庵劉公分遼陽領北  
擇掾尤慎而公在選竣事多不職獨遼陽最他道陞御史臺掾轉  
中書右曹臺銓必流內官嘗試者掾屬他轉未出官不與公起家  
除山北遼東道肅政廉訪司經歷山北地近法不給傳公名貧苦  
特給之遼東控濊貉萬里事簡而重同官不慎者動輒齟齬裁其  
銳鼓其懦和而屈之事以平允遷刑部主事時揚州總管兩淮運  
使構獄二人號囂訟朝議擇才而健者鞠之公承詔偕省臺官行

至即屈伏徵贖餘十五萬緡還拜監察御史賑濟南饑吏不得作  
姦民實被惠改樞密都事尋僉河南道肅政廉訪司事按部衛輝  
推官者誣平準官劉榮伯歐詈因擊萬歲牌破墜入以不敬械獄  
中公明其枉釋之蒙古軍劉忽都答兒爭畔折人兩脛醉縛舅氏  
截其一耳聚徒黨縱射獵毒里閑官不能禁督執之正其罪闕鄉  
郭女已妻李里豪馬賂其族誣先有約官持奪之公至而明葉縣  
民王女約嫁張歲久王欲渝約女誓死靡他召二族諭以禮致期  
歸之按行至均州以疾卒於官舍延祐七年七月四日也積階自  
承直郎至奉直大夫得年六十有四平生之官不挈家為易退計  
捐館日惟子希范在側希孟奔赴奉樞歸以是年九月丁酉葬溪  
家里先塋配郭氏淑而能家公宦游祿僅自給夫人躬蠶督耕家  
以溫飫子四人希孟中書掾及格歷工部主事都功德使司都事



中書省檢校皆有聲拜監察御史階第四品贈公朝列大夫秘書  
少監騎都尉高陽郡伯夫人封長山縣太君進高陽郡太君希夷  
廕新城尉今鄆平王簿法當廕長子孫希孟讓也希曾肇州儒學  
正希范未仕女三人適張劉李皆士族孫男四人長克勤餘未名  
女四人長適段氏餘尚幼皇慶壬子有壬以教官辟山北公實長  
幕退食講誦休期登覽一日不相釋嘗曰子朱雲誰敢相吏公監  
廷試有壬登前列喜若己得没十七年希孟具行實請銘嗚呼有  
壬尚忍銘公也夫而忍不銘公也夫士修己治人不患學之不博  
而患行之不逮也不患政之不逮而患守之不勵也昔緱山明經為政  
終始不悖高風勁節特立一時浮華違實依阿進熟雖累百於世  
世亦何望哉公始從緱山有餘力則講習問難卷帙不去手老亦  
不倦所造日深故觸事洞然蓋有得也為人寬厚勵以廉恪自為

吏危言直聲在人聽訟蒞事恂恂開諭而恐人之納於過也風紀  
狃習徵罷號能一逮於臬枉直俱困公惟良惟情濟以哀矜諄  
騰鼓不恤也故能矯狃習之弊而直人之枉有古良吏之風焉至  
於風節毅然終始不悖其善學緱山者乎銘曰

繫士為學匪博而華盍擷其實而刊其葩世方一軌狂奔景從我  
日斯邁惟理是同虫虫之氓諄諄之誨惠文東濕寧獨不愧根莠  
斯拔嘉苗培之威豈爾仇恩豈爾私按部有方敏此德惠胡不究  
用俾大而沛輶車煌煌遠易以轄良心感觸誰不涕洒先塋既妥  
餘慶無畔表世益章用勗鄙懦

故朝列大夫同知京畿都漕運司事王公神道碑銘并序

公諱述字繼先姓王氏世居順州高祖同善生殖金季貲饒一鄉  
雅不酒壽日人強之為醜得疾語其子慶常曰吾已上四世皆一



子吾又一爾家財雖數世用且不匱所懼者子孫單弱爾吾聞惠澤可以徼福人貸於我者其貸書盈篋爾於吾前燒之明日卒慶常監順州東門歸 聖朝為懷遠大將軍僉順州安撫司事三子瑜瑞琪瑜始徙燕四子天永天祐天祜天澤天祐封奉訓大夫大都路順州知州飛騎尉昌平縣男贈中順大夫禮部侍郎上騎都尉太原郡伯配馮氏追封昌平縣君進太原郡君三子長恭孝弟善治生幼成早卒次公也幼自振厲宿衛隆福宮積勞除利用監資用庫提點轉通政院判官中都留守司經歷同僉通政院事院罷改萬億騎源副提舉京畿運糧提舉禮部服闋起為大都路判官擢同知京畿都漕運司事積階朝列大夫至順辛未十一月四日卒疾革召姻族暨九交游貧者散金有差得年五十八祔宛平池水原先塋配朱氏繼姐氏封太原郡君男六十九年十二公生

長京國不汲汲於進起家五品迄捐館才四品嘗曰予所以仕急養志耳封澤及親足矣又曰予筮仕來四時九族舉在目前惟扈從北至上京繼仕中都南未嘗過盧溝不知人間有羈旅憂天地間幸人也所得既多故取官不敢復多取不負官而已占籍京驛為通政不私其宗中都始城大臣長留鑰首擢長幕一時巡幸供擬全沓剗割間雅騎源出納鉅萬同僚嫉其潔欲誣構不能汗也京府實父母邦行所無事親若疎舉無怨言始終九轉皆以能稱交游多儒生禮法是咨悼世次之湮沒請於清河元公作家譜知源流之所自多而不亂遠而有稽焉構亭蓄書畫古玩器賓至具肴酒必盡歡有壬為冷掾中都公實推轂謝之則曰子他日陶鑄我者也公之調後幸與焉承乏泰議中書公已病有壬憂去而公遂不起姐夫人遺女奴挈其孤請曰同知將屬續猶念念問公孤



未有知未亡人聞諸族老不沒為銘知同知者莫公若也嗚呼有  
壬誠知公者也公之善非一其大則孔子所謂好禮老子所謂知  
止者公有之矣惟其有之則有壬之銘之也可無愧矣銘曰  
千金比都鮮克自持矧家於京芬華蕩馳折節恭儉服膺訓彝不  
有定力孰堅不墮人亦有宦道途駸駸束帶立朝至於橫金不出  
國門族華以散養恬一室左書右琴大調親朋談笑而逝念我睽  
離垂絕不置今我來思故人星霜過里懷舊云胡不傷禦侮多賢  
族無急難永利爾孤公其益安

至正集卷第五十終

至正集卷第五十一

碑志八

贈中大夫僉太常禮儀院事輕車都尉追封樂安郡侯蓋惠

肅孫公神道碑銘 千序

河東山西道宣慰使高唐孫公致仕家居年七十七矣其子亞中  
大夫江北淮東道肅政廉訪副使天正卒於官既葬有司上其行  
實請易名於朝宣慰公走書屬有壬曰我族蕃衍而我惟一子我  
幸健俾仕四方雖不在側志樂也今則我當死不死吾兒不當死  
而死矣情之所鍾殆無以自釋獨有可以垂之不朽者得所托焉  
吾其遂可少釋乎吾兒昔與子游子其銘之按孫氏其先益都壽  
光人諱嗣翁者金末成襄鄧遂居洛卒因葬焉配張氏生德遷高  
唐生殖日盛徙洛葬高唐故又為高唐人配胡氏生居仁宣慰公



也起家新昌丞平大盜知名踐歷華要階中奉大夫累贈嗣翁嘉  
議大夫濟南路總管上輕車都尉樂安郡侯張氏樂安郡夫人德  
中奉大夫山東東西道宣慰使護軍樂安郡公胡氏樂安郡夫人  
天正字夢符妣宮氏贈樂安郡夫人繼母蘭氏封樂安郡夫人始生  
宣慰公兩夢神人授白麻文曰宣付孫天正因名焉為人狀貌奇  
偉嗜學穎悟宿衛仁廟潛邸大德丁未立東宮僚屬擢從仕郎受  
文庫副使選補太史掾監修國史掾除中書省管勾承發架閣庫  
宣慰公為右司郎中例避改都護府都事蘭夫人卒河東泣血奔  
赴毀瘠骨立護柩歸藁廬於墓側服除知沂州三皇廟湫隘至三  
日命改作民吏難之既而規置有法不三月而訖功臨沂縣去州  
遠吏得延緩為姦徒之州左捐俸倡率以賑歲饑立法均役以革  
吏弊墾闢荒田招集流亡朔望率校官諸生講誦廣社師以教都

鄰季月舉孝弟力田急情游食各一人春秋行縣躬覈之臨沂氏  
妻徐甫二十喪夫自經以徇有司四年不以聞得其實上之報下  
旌其閭嶧州豪曹誼奪細民田凡三移不為直郡以屬公立決之  
既去人刻石思之去五年益思之又相與請文刻石改遼陽省左  
右司員外郎啟歷治效灼不可掩於是臺除僉山北遼東道肅政  
廉訪司事廣寧劉大使誣丞殺人鞫而釋之人稱為神明俄拜監  
察御史劾權近斥竄之 文宗嘉其直每進見字而不名擢注  
北淮東道肅政廉訪副使行部多縱弛犯科將大懲之而一疾竟  
不起至順四年二月廿七日也得年五十以某年月日祔先塋元  
統三年春贈中大夫僉太常禮儀院事輕車都尉追封樂安郡侯  
謚惠肅配劉氏贈恭人繼張氏贈高唐縣君今夫人董氏封高唐  
縣君二子曰琮曰璋一女尚幼嗚呼予悲夫天之生材成之難而



毀之易也又悲夫子不得銘其父而父過銘其子也孫氏三世同居而惠肅又能莊於族孝於親出為良牧守入為才御史宣慰公之樂世無有也惠肅嘗欲叙次宣慰公行實未果而在其身者一旦反以累之以垂老之人罹茲荼毒其可傷也夫雖然得之天者吾不得而必之修之身者苟無愧焉則期頤不為多而五十不為少是蓋有幸不幸焉君子不校也銘曰

孫源導洛寶猶濫觴浚而擴之匯於高唐至河東公日底昌大惠肅承之舉以沃溉惠肅之生天兆其祥受知仁皇受文為郎二十年於中於外雙碑植沂百世遺愛驄馬載驅勇冠復莪清濁自彼吾其靡他茫茫淮甸荆棘塞之我銜始揮云胡折之易名以謚隱卒以封施用未究子孫其逢哀哀老親遽委而去存沒無愧修短有數於昭斯銘貽訓將來父兮子兮是亦可哀

故忠翊校尉廣海監課司提舉贈奉訓大夫飛騎尉漁陽縣男于闐公碑銘

先子佐永州幕祁陽監縣于闐公實同時其子哈八石登乙卯進士第有壬寶同年同仕於臺又同僑於鄂一日請曰哈八石不幸早孤先人功烈幾泯矣幸及故老十得一二而墓碑未刻子其銘有壬惟世交義不敢辭公諱刺馬丹以字勘馬刺丁行于闐人也于闐自漢通中國至公始為氏馬祖諱幹兒別亦思八撒刺見為邵兒十牧民官父諱迷兒阿里大名宣課提領至元十三年宋平擇守令大臣以公見世皇稱曰拔都宜邊境用命監永州祁陽縣縣接蜀廣多溪洞頑梗所穴稍失御即跳梁攝尹土豪羅飛素橫嘗有功守將劉匿不上十四年遂弄兵襲劉嘯眾至十萬公聞道赴州遇賊四至射刃七人馳出從者數十人獨固保持馬尾



免守州南門賊攻北門敗之獲其佐周遷三十人飛環而攻我既却守將追之公偵知有伏約礮夾擊俘戮殆盡擒陳瑞於木皮寨賊起五月泰政忽都帖木邱始至公率先深入繼以大兵獲飛戮之寶其皮以徇賊所署令簿尉以次授首主帥將屠縣力爭得免命招撫得戶一萬三千出石空步匿岩穴將死者四百餘人十九年飛黨黃如瑞稱宋年據縣西躬入降之得戶一百四十初飛欲害公公已入郡如瑞殺公假弟那速刺丁姊婿甘卜及降不校也四望山界四郡林谷阻深二十二年賊賀九六盤穴其中四省兵討之公焚山堙溪身為前導屠一子據黃巖嶺作亂兵將因欲屠之公曰脅從且免矧良民乎我其長也當先即刑主帥許生致渠魁當免乃赤手步入賊始未信刃掣以過公徐進無懼色鋒礙面尋閣兩肩公曰我以身保汝出即兵解不信留我以質賊投兵羅

拜曰天活我也留從者唐正以其魁出師遂還建議也種烏符大水戍低城大橋排山息饋輸鎮險惡從之湖廣省臣貪虐意公奇貨下獄幾殆既縱復攝邑父老爭餞飾小兒市歌聲公之冤省臣誅遂已公以黃巖嶺極高險當驛衝暑行尤困作粥食過者自夏迄秋歲不輟主帥憲臬屢上功輒寢調廣海鹽課提舉大德元年三月廿日卒桂州年五十有九治命葬祁陽北原娶牙里干氏先卒繼蔣氏賢而讀書事公姊如姑討賀之役陰遣勇士張甲率五十人給兵以從後公十年卒二子沙哈不丁出周氏廕道州行用庫使哈八石出龍氏四歲夫母蔣氏子之為御史贈公飛騎尉漁陽縣男蔣氏龍氏皆漁陽縣君僉浙西憲移湖北階朝散大夫公身長八尺餘勇而有謀蹈危不懼為縣十八年人號長者撫而活者戶萬三千六百四十為鄉民長子孫可勝計哉然壽不六十位



才五品爾僉憲按黔中當蜀有警諭士酋止還卒招鄉兵伺變守險號令精明人謂有父風焉諸孫種學日大以蕃嗚呼天道之有知者固自若也其有功邑民家能道之戰陳之詳則遺老無幾僉憲自浙歸及見張甲暨老兵鄧文輩得事為詳又尋病沒甲亦老矣豈非功烈之在世天實不欲滅之而使僉憲及聞也不愈於有善而弗知知而弗傳者乎銘曰

惟天生才惟才用殊才可大受而用或拘為邑孔卑游刃有餘碩犷鳴張我長乃摠弦歌未洽戈戟若林捍患禦蓄我力我心嗟嗟赤子亂豈性長獸驚波傾乃底滅亡免胄嬰鋒赤手搏虎彼心亦人其忍予侮誠感機應厥角若崩萬命嗷嗷垂死復生于屯于戍于田于耕十有八年惠洽政成降年不永有蘊未究豈嗇予身以大厥後民子而孫何日忘之我不公忘公無我遺

故僉書江西等處行樞密院事贈樞密副使護軍雲中郡成毅公神道碑銘并序

仁皇御極勅太史傳功臣罔俾湮滅復下令訪索遺逸家許自陳遼州遼魯花赤野也先帖木而上其父僉書公行實且請易名於朝致和九年贈鎮國上將軍樞密副使護軍追封雲中郡公謚成毅妣致察氏楊氏皆從封雲中郡夫人乃詣有壬請銘諸碑謹按太常之謚而筆之曰公諱葉諦彌齊魯伯解氏父諱台世役宿衛世皇徇郭公以饒勇扈行有警必前賜白金綵段名以拔空攝件事征李瓊以勞入侍上嘗陰視諸衛士腰帶見公所佩精備命佩刀糾諸士息州將請督戰官宥密臣枚舉不允錫公虎符海月符金鞍玉帶以行宋戒嚴金剛臺衄其鋒戰捐箕窩中流矢墮馬易騎復進大破之所向克捷遣子紐隣請城浮光召入面畫可



之賜金鞍一授昭勇大將軍光州等處招討使光既城總十二萬戶攻陽羅堡分鎮黃州立驛抵汴徙潯陽以阨江西下南康瑞昌德安分攻洪州章江門不克呼敵諭名將親登城敵請入約降日公自往譙其久抗王師其守列禦曰大江已失此堅閉畏罪爾明文示宥當即解甲為請於帥如約受降撫州援至敗之土坊遂入撫并下建昌撫賊張青阻險莫制偵知賊娶陽宴所居夜趨七十里聞其柵獲青俘其族脅從輩悉縱之樂安詭降既入兵亂出窻戶退則堯几填塞里巷前却創甚竟獲其首崇仁宜黃皆降偕它帥分道取閩約集建寧所至如破竹三日約兵始至黃人叛公方赴贛帥府以公舊鎮威名素著俾總江西兵往討復之麾下無敢縱掠民感德為生祠初湖廣兵屯樊口公言形勢不利其將鄭不聽果為賊劫溺死公之入也得其虎符賊中奏報遷鎮國上將軍

廣東道宣慰使進輔國上將軍江西省叅知政事同官誣搆左遷昭勇大將軍招討使入見自明賜給豐腆校隸賞擢有差為罷行省改鎮國上將軍江西道宣慰使以直前枉移叅閩省尋復江西往來閩廣平邵武取漳州潮陽番禺下汀梅循惠分寧董奇樂安貴早小州黎德弄兵蜂起悉敗獲之上欲立行樞密院徵天下省一官入議公對稱旨遂僉書江西等處行院事院革入朝上深撫慰議以名城休老會疾作不起至元二十四年三月二十日也春秋七十葬定陶鉄渠原子六人曰伯帖穆而後衛親軍千戶曰怯里乞思帖穆而曰紐隣襲公舊部明威將軍萬戶達魯花赤鎮建昌曰囊加解能左右射曰野先帖穆而始監解州移遼州改同知咸平府事附奉議大夫曰保保廢昭信尉校同知江陰州事饒州路判官孫曾人公為人持重性尤敏悟譯傳剖決纖悉



曲當有壬倅遼熟監州言先烈南臺行部過庾嶺居人往往能道  
公事雖驛郵移置靡不有法昔宋不綱我師之南也曲長偏校皆  
將帥才况佐元氣而握元機者乎公早以才器受知世皇謀  
濟其勇樹勳赫然其生而顯榮沒而崇異宜哉銘曰  
皇元繼天盛德朔基維春始艮動闢以時淳渾種才景從輩出有  
若成毅桓桓惟勗賚恩匪私曰多是任拔出偏裨簡在帝心帝曰  
往哉息師汝監襄創摧敵城光蔽南郡邑望風降畏不先何獨彼  
洪孤壘岸然我戰爾知我名爾熟沍疑晁消顛危命續黃人鼓疑  
渠魁乃殲畝棲不驚廟祀孔嚴伊閩與越指期蕩攘紛紛螳怒輒  
敢背當于蕃于宣功浮厥位原柢深茂流長實遂播美有史隱卒  
有章我師既同百世其昌

贈嘉議大夫濟南路總管上輕車都尉追封博平郡侯奧也

公神道碑并序

惟奧也氏在女真為貴族世居遼東天朝混一立賢無方敬歷華  
貫者接武中外廣西道廉訪使忽都祿既位通顯制贈其祖鳳任  
亞中大夫東昌路總管輕車都尉博平郡侯父高山嘉議大夫濟  
南路總管上輕車都尉博平郡侯祖妣石抹氏妣二王氏皆博平  
郡夫人乃出其家乘請銘諸碑按濟南公高祖忽砂虎金兵馬統  
制都元帥以功封澤王戰沒曾祖忽魯內外點檢權樞密院事祖  
峭合鎮國上將軍京西等處兵馬都元帥考即東昌公襲其世官  
謀克從宣宗遷汴壽八十一卒三子公以長襲謀克義宗播察扈  
行察平僑東平主帥錄其世時其衣廩東昌給地五千畝宅而居  
之承制除高唐知州東平控郡邑五十四金谷戶口禁不可理檄  
公稽糾宿弊一洗為州有惠政歲丙辰卒官年五十有三葬聊城



之柏林娶王氏先卒繼王氏子六人曰納丹朮山東道統軍司知  
事曰瑞童曰慶童曰安童曰文敬武畧將軍同知漢陽府事致仕  
曰忽都祿起家衛山縣達魯花赤轉臨桂興安尹治最拜西臺御  
史移南臺歷僉副凡六道廣西言岑雄無叛逆制為寢兵而雄竟  
招出朔北叛死獄杜起宗二人寃江西折分寧若磴之害舟楫者  
十所溯西賑糧虛十萬石民吏雖壞產莫償為盡釋之彰瘡能行  
履蹟屢最擢佩虎符廣西宣慰司同知副都元帥改本道廉訪使  
一年棄歸中道有旨若曰奧也為得用人縱年高衆不為例其勿  
致仕賜金段二陞正議大夫而明哲知止去志浩然矣子脫脫廢  
承事郎同知常德路龍陽州事孫男曾女若干人嗚呼盛哉昔金  
源氏奮起東北奄有中夏亡且百年世無其史故家遺俗存復無  
幾禪書間見非龐失真則暗不彰好古之士慨焉公之先由統制

而下世繼樞要其豐功偉績計必炫耀一代史之所錄不得而知  
之公再啓厥家至廉使又能推恩九原表揭世次其所以揚天休  
播先美者不在於茲乎銘曰

宋綱解紐金職夏盟苗勃水沛孰造厥成曰惟景從捍禦輔業云  
胡百年寥闐莫稱懷襄胥溺有了維禎白天迭續顛木斯萌錫田  
啟家分收著能嗟彼文獻吾猶及徵混混其源翼翼其承於繁綉  
衣晚節益貞顯隆敢專及先乃榮大哉亭毒逝者猶生百世川至  
繁祉是膺勉旃繼亭監此刻銘



碑志九

故通奉大夫湖廣等處行中書省叅知政事鄭公神道碑銘  
并序

天歷二年己巳九月二十七日湖廣省叅知政事鄭公薨於位歸  
塋有期其子濤狀其行泣請曰先公子之所知也幸哀而銘諸碑  
公諱昂霄字顯卿其先由滎陽徙澤州陽城曾祖諱珪祖諱臯金  
季亂能扞鄉里為忠昌軍節使贈嘉議大夫晉寧路總管上輕車  
都尉高平郡侯祖妣劉氏高平郡夫人三子曰鼎征大理平江南  
有功累官鎮國上將軍湖北道宣慰使領平陽太原萬戶鎮鄂討  
黃州叛戰沒贈宣忠保節功臣金紫光祿大夫平章政事柱國潞  
國公謚忠肅曰廷瑞信武將軍平陽太原萬戶其季公之父諱甫



讀書勵節披荆棘為田廬從忠肅公征蜀有功擢尹陽城十年移  
夏縣長子潞城平棘改卒潞州所至有惠政進知邠州卒贈中奉  
大夫廣東道宣慰使都元帥護軍高平郡公妣宋氏路氏皆高平  
郡夫人二子公其長也初忠肅公之薨也子忠宣公制宜襲萬戶  
陞樞密判至副使以叔父信武老擇稱者以公襲公由宿衛出鎮  
一軍肅然大德間順元土官宋隆濟糾折節阿女嘯諸蠻阻險弄  
兵樞府檄公從分省進擊首破關柵日有俘戮因糧於賊所過必  
掃蕩而後已雲南四川約兵未至他將分地應接賊乘隙紛出公  
悉敗之總田萬戶突進始通道與約兵會五年冬出師七年春賊  
平公之功居多入朝賜銀鈔金段弓矢以明威將軍進懷遠大將  
軍延祐元年覃定遠大將軍三年分戍廣西捐財賞功身冒矢石  
平靜江二十四寨斬其首梁君政擢中奉大夫廣西兩江道宣慰

使都元帥右江岑世興侵掠州縣招撫寧救復其所侵泰定二年  
復萬戶職廣西徭賊大作詔左丞乞任及公督師賜綉段甲仗給  
傳符分進焚巢獲醜有旨原悔罪者躬入險諭德意降洞寨八十  
五徭二百五十二戶男女八百五十口器械數百陷賊者歸其親天  
歷元年拜湖廣省叅知政事部平陽保定兩軍屯河側子濤襲萬  
戶改行樞密副使戰於郾師西兵罷入朝賜銀鈔辭不受明年二  
月復湖廣叅政賜鞍段甲仗征蜀四月抵播州石虎關蜀道通六  
月歸以疾辭朝議重其去不允而疾竟不起年纔六十兩娶郭氏  
皆高平郡夫人公器量雄偉讀書下士兵興動肆焚劫公所過如  
無兵長萬夫餘三十年勲名日著忠昌之積至公始疏郡封忠宣  
之明可知己我元建行省為大藩湖廣控滇蜀山海阻深徭獠之  
之所蟠穴邊報沓至獨以兵稱戍將視他省為多而藉甚在人者



獨公為稱首故其薨也士民卒伍無不悲之夫人濤婦范氏皆以  
慟絕家人倉卒但爭救母子得甦而范氏卒不救濤奉柩歸以年  
月日祔陽城先塋而戎將法不聽去濤泣欲棄官甘沒齒擯斥乃  
得請家無贏餘麾下致賻一無所受亦能子矣銘曰  
滎陽導慶至於陽城人代有聞為邦之楨忠昌啟家里閉以寧有  
開必先玉樹挺生惟我有臣忠肅忠宣弛肩豐扛伊稱斯傳大江  
滔滔百折必東彼流有源實原之逢惟柔能剛匪學莫武入而詩  
書出而干櫓魑魅穴空台衡虛席天乎不辰俯仰今昔嗟嗟孝婦  
一慟長辭義訓有柔茲焉益知承家得賢公其不朽佳城豐碑與  
世永久

故征南千戶蕭公神道碑銘 并序

吾鄉雄厚甲河北慷慨忠義之士宜生其間宋金三四百年以迄

我朝人代不乏竊思撥拾備太史採錄而四方奔走未遑也泰定  
丁卯先塋裏事內邱尹石抹刺哈不花奉譜狀跪請曰吾家五世  
居相有功鄉里遺山元公之碑具焉惟是大父征南公年少勇戰  
以沒暨我祖妣孝節夫人遭家中微力振復起若忠若節灼不可  
誣宰木蒼蒼麗牲之碑未刻無以稱先美寵後昆敢請里仁者信  
可不諾而銘諸叙曰公諱世昌字榮甫系出遼右族述律氏後賜  
姓蕭至金更姓石抹氏居涅霄至阿梭兒為羣牧使金正隆間子  
孫移戍清平杏園又為清平人羣牧生致臘兒贈鎮國上將軍正  
騎都尉河南縣開國子子 得百本贈輔國上將軍輕車  
都尉河南縣開國伯公高祖也曾祖套撒兒奉國上將軍護軍河  
南郡開國侯祖德亨字仲通以小字海住行我元弔伐之初隸行  
將太師承制拜館陶招撫使取磁州未嘗戮一人河南得鹿邑太



康生口五千餘人悉縱遣之復彰德有功遷奉國上將軍彰德路  
總管兼行軍總帥府事用是得贈三世因占籍彰德焉考珪佩金  
符征南千戶配耶律氏公七歲而孤容止端重不類童子能自力  
學始學對屬即自知聲律九歲主與魯十三襲千戶佩符征南儀  
質雄偉如成人己未扈從渡江中統建元以舊職易新命三年從  
討李璫七旬不解甲復宿蘄皆有功至元六年春取五河口手馘  
四十餘人鉤兵及賊反曳以去拔劍斷其臂搏戰舟中血流沒履  
得戰艦二資械無算今血履故在統軍上其功未報七年正月十  
七日卒於軍年二十有五夫人段氏 千戶高奴女嚴魯  
王甥年十五嫁征戍悉從二十三居麓二子恒始七歲謙二歲挈  
孤扶櫬歸莫安陽建善村新塋遂屏絕華飾始終一節事姑盡孝  
教恒葦學雖長有小過不少恕孫刺哈不花五歲母亡躬自撫育

宗族貧者周給恐後身自儉約與家人同一門三百口肅如也至  
元二十二年中書以孝節旌其門大德十一年三月二十四日卒  
享年六十祔征南墓恒亦年十三襲公舊部征交趾戍邊徵以疾  
歸封武畧將軍飛騎尉臨漳縣男謙精國語由河南省蒙古史除  
承事郎河南省管勾奉發架閣庫擢承務郎杭州路仁和縣尹天  
上卒孫男六人曰處義襲父職曰處禮處智處信處約皆恒子刺  
哈不花謙子也一名處仁起家宥府行人監修國史蒙古史除從  
事郎益都路嶧州判官河南省蒙古史擢承務郎順德府內邱縣  
尹有惠政女九人皆適名族曾孫男六人女五人皆秀於戲征南  
忠義之氣發於戰陳天不引年而止於斯使極其用所就可勝言  
哉夫人以節充忠舉石抹氏之已塋享有丕基延畀子孫豈非天  
將侈其流而先嗇其源耶銘曰



述律諸孫歷變再徵有興子相度乃釋機韃橐啟行風雲際時彌  
難方狙我戈弗揮係累載途解險縱歸後承惟肖淵淳以施秋隼  
脫鞴天馬去羈五河晝暝捷書夜飛焯勤孔昭玉山遠頽孤嫠哀  
哀馬革在轡九原既安一節不移孰堅可磷孰大可夷韓山峩峩  
洹水逶迤永祀益昌式此宏辭

### 五龍廟碑

龍於天地間為物最神乾首六十四卦獨是取象其以神變不測  
時乘御天雲行雨施蒸民乃粒功莫與京乎大塞堪輿小為蠶蠟  
能短能長能幽能明者神之末也管子曰龍水之神者也乘水則  
神立則雖神物其亦擇所可依而後能神其神哉江河湖海固其  
家也天下之曰潭曰湫曰巖曰洞曰池者非一必皆幽深僻險有  
水可依而後居焉土人往往時見光怪不敢褻也而又早暎有禱

則從而祠焉彰德府路安陽縣西北五里洹水之陽有五龍廟廟  
之下水黑而深洹水至是瀦而後泄其龍居之淵乎太原元裕之  
效虞初書言明昌中風拔廟樹印地有跡事頗涉怪而不及廟之  
建始何時其號五者具五方為象設爾以其禱之屢孚也路達魯  
花赤荀公凱霖同知阿蓋判官毛刺真嘗修其廢築臺其前至元  
四年戊寅夏旱甚甫事請禱六月二十日甲申總管杜公德遠始  
下車憂惶無措曰不才之來丁旱之會又數日不雨則苗盡槁人  
何食賦何徵責何以追盍走靈祠而禱諸荀公曰五龍廟效靈自  
昔協恭精禱神其聞乎於是率獠屬齋沐具香幣禱焉戊子行事  
雲俄起是夕微雨越翼大作三日乃止苗之槁者淳然而興市之  
閉過者發人之轉徙者息病者以蘇訛言以寂豐凶笑顰變乎旦  
夕既報祀安陽縣尹趙君時敏請刻石以昭神貺以達邦君之休



夫龍與人異處昔聞涓子產以為吾無求於龍龍亦無求於我  
惟其無求則子產之言是已為天子牧守其土養其民以供貢賦  
而歲將告飢人將轉死苟可弭蓄當即致其極則其能無求於龍  
乎且龍之托於茲水以神其神人象而祀之有年矣應捷桴鼓亦  
其宜也否則將不與搏土縛芻等哉抑聞之雨由乎神而亦由乎  
人至誠貫金石信及豚魚况龍之神人之誠有不格者乎然而龍  
之德不可忘也祭法曰山林川谷邱陵能出雲為風雨見怪物皆  
曰神洹水有龍龍能出雲為雨祠亦宜我書其槩申以迎送神曲  
俾祀而歌焉其詞曰

洹之水兮沖融祠其渙兮惟其漑羌自瓊兮神龍沕擇勝兮實所  
宮甍之虛兮蘊隆龜吾田兮稿吾桂種將竭澤兮及爾躬哀吾氓  
兮疲瘡忍及喙兮弗充龍之怒兮奮飛豐隆前驅兮屏翳後隨騰

清波兮淋漓沛為霖兮鮮厥萎報祀兮孔時冷風肅兮滿旗鼓坎  
坎兮參差荷神嘉兮無期

膏澤施兮不屯苗其傑兮木欣欣牲之膾兮醪之醇琮席靚深兮  
縈燎薰享不儀物兮享以人龍之去兮逡巡嘘雲氣兮氤氳歸九  
淵兮深藏歛大惠兮芘一方時潛飛兮則其常有叩斯應兮惟爾  
之臧百穀充羨兮遺秉在田龍兮龍兮人不爾諼

故中順大夫同知潭州路總管府事致仕趙公墓志銘

先公篤義里閔遇不識亦為具况久敬者乎大德間衡州有滯獄  
司憲移醴陵知州趙公往按始決公里閔前輩也先公時佐衡幕  
挈有壬進拜問所業且命賦詩偶不辱教公後休致終於臨川子  
藝敬勤著聞先公以子妻之公殯二十餘年奠慮先塋之或不治  
子孫之遂楚也慨然動營邱反周之念啟公之殯以某年 月



日祔先塋奉集賢侍讀學士李公倜撰次行實屬銘有士有士惟  
里開世契重之以婚姻義不可辭乃擷其狀而銘之公諱良輔字  
良卿彰德安陽人祖諱浩國初為郡經歷能制主帥濫殺有佛子  
稱妣徐氏考諱謙河南統軍司照磨贈中順大夫漢陽知府上騎  
都尉安陽郡伯妣段氏追封安陽郡君皆葬安陽孤莊公弱冠入  
京當途薦為四川屯田令至甫閱月念太夫人遠即棄歸御史大  
夫相威公行臺揚州選為掾及格除淮東道按察司經歷外舅王  
公好禮為使法當避改鎮江路金壇縣尹有劫制官吏短長惡子  
十餘人揭其名於市諭以禍福皆不敢犯嘗賢勞歸係囚盈獄時  
寒食因悉縱使歸拜掃約三日來無一人逸者告飢於郡遇大風  
舟幾覆公端坐曰吾為民死不恤也風俄止得米三千石以歸闕  
草萊為沃壤民用康裕朝廷以公五事告布天下俄太夫人卒哀

毀盡禮服除擢平江路推官平江獄訟素劇夜則露香額天晝謝  
賓客宴娛閱實簡牘直那百五等之枉七十五人明張元之非故  
殺甲刺乙之不得已皆獲免死時朱張二家豪震中外其徒固千  
戶主殺沈昌妻奴三人官莫能制公督捕竟寘於法陞新喻知州  
民有犯惡逆者州僚懼罪莫發公時行部聞之曰吾承宣不稱罪  
輕蔽元惡罪重亟歸執問具伏斃之獄中有母訴其子者徇於市  
令母往視杖其子立母於庭戒五百諷之曰今杖子必死子死爾  
何歸盍一訴官或矜焉母果流涕懇請公初不許久乃呼子語曰  
吾欲死爾哀爾母請貸爾餘杖當改過終養母子感謝而歸或問  
公公曰盡法子必讐母又不可以言化吾但啟之使母動哀子之  
之誠子知感母之德彼亦人也能不格哉聞者歎服改醴陵知州  
時有事西南夷轉餉於播道殫相望富室坐周敝爭賂免行公按



籍發丁莊夫不能舞其智暑途肩運十不一至乃潛人走播得其  
實直集編戶挾貲就糴以輸民大使之承檄正他郡職吏八十五  
人遷撫州路治中值大饑勸分得數萬石未為建昌路同知益勵  
精不怠風紀之薦無慮數十上方六十九請老加中順大夫同知  
潭州路總管府事致仕公生丁未二月某日終以延祐戊午正月  
甲戌春秋七十有二初娶李氏早卒繼王氏又卒皆無子繼周氏  
封安陽郡君至順三年正月甲子某日卒今從祔子七人登彞璉  
鼎璋琮璧登早卒彞璉琮璧周所出也彞初娶李氏集賢女早卒  
生子洙繼娶有壬妹巽貞又卒生子汾今娶王氏女三人公為人  
樂易世產悉推於昆弟俸入之餘時給族黨賓客過從必治具盡  
歡疾革戒諸子曰吾平生不知殖貨無以遺汝汝能自立是吾有  
以遺汝矣斂葬若祭視家有無勿用緇黃俾書而手署之以付周

夫人命酒獻酬無異平時久乃嗒然而逝嗚呼達矣哉有壬求公  
之故而竊有感焉士一命行志崇卑不計也他尚何別哉近制仕  
州縣有績則擢風紀蓋州縣治民者也風紀治官者也重輕既殊  
地亦不能無別焉今仕者必入風紀始名為才至于謁求之求而  
得君子不貴也公自始建行臺為名郎歷外郡皆著績宜握糾繩  
之權而薦章數十上竟不報公亦恬不為意仕宦四十年而致仕  
止四品天之靳公若是哉然而居治民之地行治官之事雖不為  
猶為也顧為而不能行者獨無愧於公乎彞由世賞而為臨川丞  
掾行省歷翰林編修官撫州路推官江南行省都事諸子仕皆有  
途公遺署不忝矣銘曰

昔奠南紀分臬維揚濟濟乃僚靡遠弗翔胡界一邑俾達而鏗  
衣纍纍遇以此誠縱使悉歸省乃樹封公不忍而能負公人歛



于飢土豐于荒焯其偉績播之四方無屈不伸無幽不明世知其  
怒不知其平毋不子隱子不母從惟因爾天以觸爾表茲惟愷悌  
超黃邁龔治莠以緩御煩以清死生之際不渝故常浮雲富貴視  
之宜輕山川雄渾實惟故鄉善人輩出匪私匪同大行之左洹水  
之陽也其百支茲公之藏

至正集卷第五十二終

至正集卷第五十三

碑志十

西域使者哈只哈心碑

至大己酉始建中都設留司荀公暗都刺為都事有壬為教官乙  
邠計偕又與其弟凱霖同旅次京師後屢合輒道故舊懽甚凱霖  
以交其兄弟之久知其踐履之悉也走狀京師請銘其祖考西使  
公碑夫聞善而與之君子之心也况交其子孫而銘其父祖乎公  
諱哈只哈心阿魯渾氏世西域人國去天朝遠而險非誠懃不可  
至公凡兩至人與其勇鎮阿水里渡 太祖皇帝兵壓境公斷  
渡修壘堅守持久衆怨公不降懼破則殘爾公嘆曰廢興有天我  
非不知但臣子分當爾也衆益瀕洞將內變遂降 上按劍問抗  
師狀先斷其髮將誅之正色對曰臣各為其主非罪也死不過汗

至正集卷第五十三

碑志十

三十九



一席地何恨但恐無名爾 上壯而釋之公仰瞻天表知可乘時  
樹立因進曰阿特伯失刺子國堅盛非他國比攻之必難拔其主  
與臣善請往招之制可按兵馬魯察城公單騎趨其國諭以禍福  
遂舉國內附錄功擢領怯怙口既班師諫王旭列邸從戰必捷屢  
入奏稱旨歲丁巳割彰德路為分地江南平益以寶慶路王邸在  
極西絕域遣使必慎擇其人以公偕魯思樞木子古里沙的入覲  
計事公夙慕中土因挈家行目疾留豐州至燕病平時至元五年  
八月廿三日也享年一百一十七歲初公至和林元帥荀公竒之  
妻以女生二子長阿合馬早卒次阿散一女適馬合謀荀氏繼沒  
皆蒙殯都城西朝廷念其勞以阿散為大名路稅課提領麥砧哈  
樞西域名族念公之賢贄阿散其家生二子長暗都刺始三歲次  
凱霖始三月喪母繼張氏二子担古伯怯烈提領以至元十四年

十二月卒年四十有四蒙殯大名暗都刺兄弟鞠於外家攻儒書  
既長益習禮訓謀於師友曰古之姓或官或封無常也吾其從祖  
母之荀乎遂姓荀氏又曰我兄弟讀書學禮無名字其可名則不  
敢忘吾先而字則從華可也於是師友相與字暗都刺曰平叔凱  
霖曰和叔平叔入京初補吏從儕類試藝官不示以目俾以意自  
書而觀其優劣焉平叔獨列法家結素字綱以對主者驚異由左  
司令史轉戶部令史宗正府史中書右司掾除前官遷大都路警  
巡院達魯花赤階承務郎皇慶壬子十一月卒官選格分地監都  
縣聽自除拜西邸以和叔世隸其邸擬寶慶路邵陽縣達魯花赤  
中書奏可官進義副尉移彰德路臨漳縣進保義校尉平叔之喪  
躬赴之瘞祖父母殯側酌其遺通挈嫂姪婦養於家以其職廕弟  
担古伯內黃稅使臨漳終更移安陽愛其山水思妥其先卜地司



空村有飄風旋塵為渦導馬首者七衆皆見之下馬默禱若吾祖  
考宜此地當止風即泯買而為兆域遷祖考妣考妣兄以泰定四  
年歲丁卯二月癸酉葬焉以公西來而為使也表之曰西使之阡  
嫂阿速刺氏姪安童繼母張弟担古伯相繼沒俱祔焉遷林州達  
魯化赤陞奉議大夫彰德路總管府達魯花赤兼本路諸軍奧魯  
總管府達魯花赤管內勸農事丙子春早入境即雨和叔自謂偶  
然而民心用是悅其表也作洹水石橋修公廨傳舍百廢俱興娶  
古華氏子頑童女帖里俱墳齷齪善良敬戒家法秩然我元始征  
西北諸國而西域最先內附故其國人柄用尤多大賈擅水陸利  
天下名域區邑必居其津要專其膏腴然而求其善變者則無幾  
也居中土也服食中土也而惟其國俗是泥也和叔則曰予非敢  
變子俗而取擯於同類也其戾於道者變焉居是土也服食是土

也是土之人與居也予非樂於異吾俗而求合於是也居是而有  
見也亦惟擇其是者而從焉自吾祖為使而入中國委骨於是若詩  
書禮樂吾其可不從乎俗之不同理之類異吾其可從乎於戲若  
和叔者孟子所謂善變者也其俗不銘而銘其先其俗墓近人而必  
遠五害此其變之小者也若使公自絕域入中國有勞未食及荀  
夫人皆殯於燕提領則殯大名平叔又殯於燕南北契闊凡幾易  
年始合於一繼母嫂弟姪又相繼沒其入兆域若生者之有家暮  
而有所歸也使為孫子弟非和叔則九殯四置幾何而不為不食  
之鬼哉世有忍同室為溝中瘠沒委之而顙曾不泚也故凡觀人  
之先不在子孫之富貴而在其賢不肖爾嘗聞西域人多壽考公  
度越上壽至燕年已若是其馳驅幾萬里矣計其宣力自壯至卒  
不衰也吁其亦異人也哉銘曰



于闐之山美玉出焉雄鷲沉毅實生其間犀兵內牴巖邑外環而天命有歸則取於殘大人崩厥角小人食其簞有如此渡吾力可殫吾分不可千萬心一潰其倒如瀾惟義所在天誅為寬伏軾掉舌扶危作安唐睢九十惟古其難何百歲餘驅馳克艱施不究於才用不崇於官流澤逢涌有子有孫弗矜好爵詩書是敦仕能愛人家能裕昆是知親親仁政所原四世一兆宰木鬱然年雖百千祠鄉之人孰不思而指曰此吾使君之祖西使之阡

故承直郎僉嶺南廣西道提刑按察司事葛公墓碑

昔江南平中土人南走若水趨下家而占籍者有之銜命仕者又倍蓰焉芬華因循忘棄鄉里至葬其親而不歸或志歸不力子孫單弱馴至迷委又不若遂葬之為愈也幸而歸葬漫不復省日就捧第雖愈於迷委而孝子慈孫為不若是想也家致千金身為進

官有所不免况貧賤者乎惟篤於孝思的然有見者其庶幾乎進義校尉武昌路黃岡河泊提領葛君暨其弟永州路祁陽縣幕以至元四年戊寅歲奉其母完顏夫人之柩歸村輝州孫村先塋至則纍纍不容復窺卜其南為新阡遷祖考按察公而下凡十三墳按察公勅誥俱逸訪親故問蓋家人質於汴且三十年倍酌而得之泣相謂曰吾先累世弗耀及大父起家元宗所至有善政子孫宦學不墜餘澤所被也新阡實祖我按察公而行者流離居者貧乏不表之阡是知有善而不傳且再易世將不可復考矣乃狀其行實求銘於子予嘉其志乃為銘之按察公諱榮世為淇上人曾大父大父羅金季亂皆能不去鄉里天兵之南也自奮出說郡守率郡人迎王師鄉里賴以生全者公之考諱旺者也元帥別烈罕命招納降附倡議置縣蘇門因署為令公任授衛輝二州提領譏察



使改蘇門主簿蘇門改輝州復提領譏察使陞輝州判官蘇門復縣  
仍主簿而兼尉焉中統初經理江南地居水陸之衝軍興駢沓儲  
備餉給吏之宿毒不能病民調衛州鎮撫軍民彈壓官兼錄事三  
年復輝州判詔課農桑時河北荐飢部使者頒區田法郡邑不昏  
於行檄公按覈躬率野人相宜授方熟得百倍土之境墉者教以糞  
糞鄰境法焉詔農課最遷蘭陽縣令耕桑學校益著其績擢敦武  
校尉磁州判官雖居底僚下從而上信也州當孔道名遂藉甚轉  
平陸縣令兼諸軍與魯平陸號難治至即繩豪右勵游惰崇儒修  
教敦本抑末恤征人使居行無慮五事考脩大盜党五方橫求盜  
畏縮公攝尉以計擒之盡其黨擢承直郎僉嶺南廣西道提刑按  
察司事徭賦方熾有司並供億為繭絲求其弊而刮剔之墨吏有  
聞風而遁者俄卒於官得年五十有五娶謝繼朱陳耶律子男七

人晟德承事郎岳鄂權茶提舉晟信累功至千戶晟美廕濟源玉  
屋巡檢謝所出晟義淮安鷹坊打捕提領某某早卒朱所出晟智  
陳所出也女一人適張氏孫男十二人曰平提領也曰順江西憲  
司書吏卒曰玄縣幕也晟德之子也曰友直以疾廢曰友諒將仕  
郎處州路縉雲縣主簿曰友聞黃州路蒙古字教授晟信之子也  
曰某某曰淑益晟美之子也曰國賓曰國瑞晟義之子也曰納海  
晟智之子也女七人俱適令族曾孫男九人女十八人公之先爵於  
季世至蘇門公崛起挈垂死之民而生之設施才具可驗也公蹈  
其躅效用兵荒之餘先之以耕桑申之以學校知所本矣惜其服  
政方隆而尼於壽子若孫曾孫三十人有以知其後之必大也平  
也玄也家非千金也身非達官也篤於孝思的然有見可謂賢已  
後之子孫宜取法焉銘曰



天造未暢里將受兵有奮其傑挈之於生保我一鄉不騫不崩搗  
邑未施乃啟厥後細民奠居大盜獲醜爰酌其功擢之繩糾天胡  
不辰歸舟有樞舊封雖受新阡惟宗若尊若卑昭穆是從固以閑  
垣翳以柏松既表其世亦章其庸子孫既多自南自北豈不同居  
勢不可一世或再易邈將不識興言及此淚出橫臆勢不可一理  
則可周百世繼體四方省邱自根求枝泝源及流視此貞石我銘  
不浮

元故中奉大夫江北淮東道肅政廉訪使胡公墓志銘

安陽胡公里人也始在京相從而不相知有壬擢第歸江南先太  
夫人語其狀後問之乃驚喜曰吾親亦令求訪謁而不謂得於今  
也承乏左司員外郎公為右司都事為右司郎中公代為員外郎  
先太夫人祔安陽武官塋公亦居魏郡夫人憂倚廬相去二里許

時相慰也公入朝居中臺有壬叅議中書省事俄為治書侍御史  
又同事焉未幾公以病歸除河南江北等處行中書省叅知政事  
不行改江北淮東道肅政廉訪使一至即歸有壬待罪中書者五  
年始得請至鄉里相見甚懽公嘗力疾為具方念秋益涼病日退  
當日相從游而不意天之殲我故人遂至於不起也孤敬伯泣而  
請曰先子德善匪公誰屬嗚呼契闊之久始得合并而遽銘其墓  
耶公諱彝字安常姓胡氏雪埜其自號也世居鄆陵貞祐之亂遷  
安陽遂占籍焉祖諱珣累贈嘉議大夫吏部尚書上輕車都尉追  
封魏郡侯祖妣祝氏累封魏郡夫人父諱景先累贈中奉大夫江  
浙等處行中書省叅知政事護軍追封魏郡公妣王氏追封魏郡  
夫人葬安陽孝明原二子長則公也夙稟穎悟起家鄉校官轉大  
都路儒學錄中書叅議器其才辟掾府中歷儀曹宥府為中書右



司掾除工部司程工部主事除河南行省員外郎省有小人欲以糧傾其僚公抗掾之力居多歲飢贊省臣擅發廩活飢者命河西隴右道肅政廉訪司事行部涼州辨盜牛之寃而正贓吏之罪拜監察御史遷右司都事計事行在所張寔者陳言伏路左乘輿之馬為驚將誅之抗議得免上都獄有殺人之夫者賂西僧將用佛法曲赦之公力陳其非卒正其罪升左司員外郎尋除工部侍郎鄴州倉為水所犯作渠分其勢公所董萬人夜忽舉火譟潰同僚惶懼公但靜坐至旦繩其首衆復安役魏郡公訃至奔赴迓襄事羸毀骨立服除拜陝西諸道行御史臺治書侍御史太夫人迫之使行當關中大飢之餘甫事經畫而太夫人訃至既奠遂廬墓側手樹松柏大作瑩門甫大祥除江西湖廣道肅政廉訪使未行改戶部尚書請使交至鄉里榮之戶部兩遇朝廷有大故領諸王費

鉅萬計公建議以益易銀賜用以足拜治書侍御史陞侍御史既歸除河南不行至淮東即歸疾革盛服扶坐教弟子家人覩縷明盡請郡侯杜公宏道與之訣又作詩留別其友五人有一其也治命柩以論語殉勿歛華美勿用緇黃言畢而逝公生至元十八年辛巳十二月二十五日丙辰以後至元四年戊寅閏八月二十七日薨於正寢享年五十有八以是年十一月十二日壬申祔魏郡公塋娶楊氏封魏郡夫人一子敬伯也國子生補侍儀舍人一女適侯思禮平生刻意字學憂樂不廢其薨也鄉人皆以為歷階二品年及六十身居鄉里弟若子皆在側以疾終於家在公為無憾予獨以為生之易成之難世既失才予復失友其能不為之痛哉銘曰

公昔入京蜚英妙年我從之游莫知其先尚論世契悔言之遲天



復遂之聯班鳳池憂患歸來創鉅盡瘁一線涸水泪血相視臺閣  
路遠公閑我未觴詠未竟松柏遽摧琅琅耳言巖巖日存述美貴  
知子予所悖霜鶻騰秋俊邁無前人有菜色以腴以鮮小人犯蹕  
斧將及吭何以生之力陳其狂坐鎮衆喧力障狂流時名即我我  
豈名求分藩既重領憲亦劇匪病匪老敢忘帝力歸來里閑詩酒  
自娛誰謂一旦古今異途遺辭及予字仍飛動墓雖宿草哭猶為  
慟孝明之原祖考是從我銘不佞永志幽宮

至正集卷第五十三終

至正集卷第五十四

碑志十一

故封從仕郎武昌路武昌縣尹萬君墓碣銘

愚昔在京聞咸寧萬君隆師教子季弟有孚就學其家辱視尤厚  
天歷戊辰識其子國鑒明年季冬娶於咸寧始識君而登其堂焉  
至元四年戊寅歲七月戊申君以疾終於家己卯十一月庚申葬  
邑北雙鴻灘湖白塹諸子請銘其碣按宋有諱思杞者齊郡無棣  
人為江西提刑因占籍豐城君遠祖也至高祖炳游鄂愛滄川山  
水家焉曾祖諱必大妣范氏祖諱從龍妣劉氏考諱文舉妣宋氏  
君諱希孟字醇甫生七歲丁勝國訖籙從母逃難俘至沔州西避  
迨世姻張叟說其將得贖歸則故基餘廩舉為豪據宋夫人携君  
訴官僉省鹿泉賈公方事撫定檄王者皆復之長益刻勵奉母孝

至正集卷第五十四

碑志十一

四十六



謹部使者將表宅里固辭乃已表姊良人吳誣構下獄事急質田於君約三年贖事俄白即請贖君急歸之母黨曰濂者田將淪於質君曰貴易契業不易創奈何棄之吾念世戚非利之也假婚出之歲入其租及其直即反之舅氏前進士楊溪先生振君子立楊溪病以二子託既卒挈歸教育經理其家天歷己巳大旱有儲者皆閉過以俟翔貴君發廩平其直出入斛斛不二民有李賈各棄田若山林易穀直有成約明年春直增倍差二子始耒如原直給之邑屢災後先三千餘戶戶賑穀一石所識窮乏者倍之居直火衝者再四鄰煨燼而居獨巋然人謂陰德所致郭德芳死無以斂遺之杉材其子伋酬直千緡君曰吾與而父分雖舅甥義若兄弟忍利之耶監縣伯顏坐誣就逮以屋居其孥伯顏卒為具棺衾資其家使歸作德新堂儲書延蜀老儒王履佐才八年佐才捐館躬

治舍祔棺斂將擇地葬之其子欲葬鄂不能止乃厚購之復求明師勉諸子終業且語之曰甲戌秋吾祖挈三子十三孫避地舟居吾最孱弱後獨吾母三人歸不意有令爾曹一乃心力庶幾無忝枚舉其名因其才而教之後皆如其言用子國鎮官封從仕郎武昌路武昌縣尹既受命而終壽七十二娶孫氏先公三十三年卒子五人曰國鈺能世其業曰國鎮起家荆南宣聞知印湖廣省行人除黃州錄事曰國鑿中延祐庚申鄉貢進士舉曰國鉉曰國銓皆儒業女三人長適李德潮次適吳棗幼未字孫男六沫沂淵汶濂渭孫女四君莊慎有識度楚俗鬼君獨不詔豪家子率汎習君獨教以詩書殖產雖豐而衣不兼采食不重味賑災惠乏乃復不靳其齧齏才遺脫身來歸舉已墜於陵谷變遷之餘既復其舊而又有加焉者其有以哉嘗患世人必官而行其志官固行志之具也



不官他果無具乎力不能及人而不能行其志宜也力可以及人也獨非行志之具乎惟能推吾之有餘以濟彼之不足其及人不博矣乎食人之祿而受其寄者有所不及也况從而賸之者乎君之榮於生而昌於後宜也銘曰

仕食其職不職其憂受人牛羊芻牧盍求貪夫徇財死易一錢同室秦越人何望焉不官我身幸裕我藏忍乘爾危遂搯爾吭提攜僵倮形鵠色菜不易吾斟不力吾概灾戶三千戶凡幾人露處嗷嗷而腹我困昔君之來踽踽其迹今君之老子孫蟄蟄有朱斯服由葉漑根何以致之經籍教敦雙鴻卜吉嗣承惟賢支百伊始其昌其延

故成全郎諸路醫學提舉部公墓志銘

公諱文忠字信卿姓部氏世居河南業為醫金亂昆弟四人北渡

河亂離自給其諱成者公之祖也占籍濟寧尋遷彰德因家焉妣某氏考諱妣氏公幼讀書師紫山胡公以儒為醫故所造諸

視世之專門而局於其術者有加焉擢大都路醫學教授恪盡其職太醫院知其賢不使出而浮沉郡邑也累升成全郎諸路醫學提舉秩第五品太醫院總天下醫政而考覈課藝薦擇校職提舉實握其要雍容其間以稱職聞致仕歸築別墅洹水之陽自號洹溪野夫日與老友詩酒相娛樂至元四年戊寅歲閏八月二十八日以疾卒於正寢享年七十有六配王氏子四人長曰元早卒次曰宏業儒出官除郎利用監知事次曰中曰恪皆為彰德路醫學正女三人長適李次適王次適郭孫男三人女一人俱多以是年十一月日祔安陽清流原先塋宏請志既按其狀叙其世若履歷矣他及知者湮沒可乎公為人純和而舒徐與人交



無少長皆得其懽心自其為醫官里之醫苟能效一藝隨其藝高下皆推轂使其不為齊民先公捐館京師歸葬之議未決公厲言主鄉里之議不敢忘也予得請歸蓋欲載酒相從而尼於塵事者數矣其生也不能盡生平之懽今沒矣何以泄吾悲者獨銘爾尚敢辭哉銘曰

粹其著懿厥稟引年歸曲肱枕土維稼洹可飲未予卑均五品七十六得已甚生治世卒正寢子服官迹方闡渡源肆日以浸清流原澤不滲銘幽宮子子審

故嘉議大夫廣東道都轉運鹽使贈通議大夫戶部尚書上輕車都尉追封高昌郡侯合刺普華公墓志銘

公諱合刺普華高昌人其先曰噉欲谷者助討安祿山封忠武王數傳至克直普爾公高祖也遠錫號阿大都督曾大父岳弼大夫

亞思弼世有奇勲皆國相父岳璘帖穆而慷慨自植兄他理加普華柄用既隆殺西丹僧稍監復有功左右忌而譖之不能自明乃同歸我朝 太祖皇帝待以殊禮而留為質焉傳皇帝幹真以

孝悌不殺統治中原從平河南監軍民總聽斷化行盜弭以壽卒官公多奉母與寡夫人居益都慨然趨父官所請學父奇其志授偉兀書儒書性警敏誦軌不忘李壇叛母夫人逃難相失公晝夜號泣從父行省撒吉思平賊購獲奉歸行省器之薦入宿衛使益都立四脚山冶以勞授金符都提舉尋讓厥弟天兵之南擢行都漕運使饋輸以濟宋平上守成策大要存國體勵士節定官程厚民生招舊族撫新民時論避之江南漕秣米二十萬石由邗溝達河舟覆損十之一斛之出納復有大小之耗責償舟人公抗言多寡有量水覆非人沒責償非宜請獨當其責報罷時相憤嫉黜監寧海



路遷江西宣慰使改廣東轉運鹽使兼領諸蕃市舶私販之徒連  
萬人作亂行省檄公暨招討使答失蠻捕之渠魁既殲親抵巢穴  
悉招出復業條鹽法不便革之劾按察脫歡姦利罷之盜歐南喜  
破城殺吏衆號十萬公圖上阨塞并攻取策分兵搃之功最諸將  
占城之役護餉道遇賊歐鍾鋒甚銳公慨然曰軍餉重事退縮誤  
國可乎率先力戰矢竭馬劓格鬥踣數十人氣益厲兵寡為所執  
賊欲奉為主公大罵之遂遇害至元甲申二月十九日也年三十  
有九屢見神異越民繪像祠之某年 月贈通議大夫戶部尚書  
上輕車都尉追封高昌郡侯配希台持勒氏賢操夙著後三十五  
年壽七十二卒封高昌郡夫人二子長曰傑文質以其先出傑輩  
傑河因傑為氏焉守廣德治最諸郡累官通議大夫今佩金虎符  
同知廣西兩江道宣慰使司事副都元帥十歲封股愈母疾人謂

忠貞孝萃一家繪三節圖傳之次曰越質倫早世女一人鎮江忽  
都花適霍氏海牙孫六人曰傑玉立延祐戊午進士朝列大夫濟  
南路治中曰傑直堅泰定甲子進士承直郎同知新昌州事曰傑  
哲篤延祐乙卯進士奉議大夫南臺監察御史曰傑朝吾至治辛  
酉進士承直郎枝江縣達魯花赤曰傑列麓至順庚午進士將仕  
郎湖廣行省管勾皆文質子曰善著泰定丁卯進士將仕郎淮安  
錄事司達魯花赤越質倫之子也孫女四人曾孫男九人女六人  
公少有志節器可大受用兵理財纔一節爾而履閱所施人視為  
法至於見危授命則大節可知已延祐設科今六舉公六孫舉輒  
中一人唐宋盛時儒家世科未有如傑氏一門兄弟之盛天下傳  
為美談不知其先何修而得此於天也觀公之行則天道可知已  
然亦竊訝天之屑屑然若有意於報公秩秩然猶舉器而列置於



地者豈以科名之貴實出至公不於彼而一於此以必天下後世之信於為善耶抑公之忠義在天地間百世不泯精誠之至則與天一其必於天者自有在也於孝悌氏其益顯矣 年 月 日  
改葬公滕州禮教鄉清溝原使來請銘悽哲篤於有士悽列荒於弟有孚皆同年義不敢讓為之銘曰  
惟悽輦水太古未瀉其鍾為才天下之奇流祉在昔盛乃萃今繫尚書公曰大是任純孝生知忠貞有自王師弔伐允資餉饋六合既一守成異宜大攄厥蘊以昌聖時督漕權釐寸莛巨鐘民死而生民盜而農力戰無前蜂蟻敢兵沒當厲賊首離豈懲嗟嗟越民廟祀無斃匪公之異實公之德天之報公曰惟顯哉諸孫聯科鄧林取材東山下吉土厚俗善帶以清溝猶昔悽輦慶源再啟時出其淵刻銘納幽何千百年

故奉政大夫鉉山州知州兼勸農事元公墓志銘

高平元利甫始識於京實大德丁未春距今至順壬申凡二十六年至治壬戌承乏南臺御史行部江西利甫為權茶判官泰定丁卯先公祔安陽先塋利甫先卜築吾鄉偕鄉人致賻惟謹今年鉉山代歸又及先太夫人祔既襄事六月二十九日拜賻於其居郡東北張見里潔衣肅迎喜動容體謂其居陋密適右丞文肅韓公別業假屋延致三起視其具平生歷履資格崇早子婿性質外家隆替若耕織織悉以相告予方撰屨利甫忽召僮急求水飲已曰我胸中躁俄左臂足不隨但云頭痛者再僮欲扶歸已不能履若將奄奄者夫人子女皆城居予為之撫叱僕婢分走求醫來已不及矣以九月十八日葬張見西原其友封禮部員外郎杜愚狀其行挈其婿馬緒致夫人高平縣君韓氏之辭曰元門一旦至此所以



圖不朽者其孤未有知未亡人是責沒雖不幸幸適有遇志其壙他復誰託予憂患中不輕出出際若是不少後先且告言覩縷若將有託焉者是亦果有不偶然者乎按元氏世為澤州人祖諱寶妣齊氏考諱瑋累官承務郎樞密院都事贈奉直大夫澤州知州妣姬氏追封高陽縣君五子曰大同路行用庫使曰冀寧路總管府判官曰亨利甫也曰孚沆州路總管府治中曰高年縣務使利甫弟侍親讀書京師通譯書國語補武備寺史除將仕郎武備寺丞發架閣管勾歷壽武庫副使利器庫大使選補中書省史除中書省架閣庫管勾轉奉訓大夫武備寺經歷母憂服除起為彰德路總管府判官京師歲所需物郡邑例買於民其直曠久不給給則大半入貪吏手名為和而實白深懲其弊先付以直民甚德之橋道圯壞率皂隸應其深役民輸粟倉吏徂歲弊取贏絕

治如法橫費為省郡雖家居私謁杜絕分憲行郡或託士求舉叱之曰心苟不慎虛譽何益而憲推廉能乃為舉首秩滿有彰德等處鐵冶副提舉之命未赴改奉直大夫江西等處權茶都轉運使司判官茶法病民郡邑尤窘釐不便者數條課亦告登舊弊出額取分例錢官吏恬習謂當受猶俸祿然一切却之風紀舉堪守令遷奉政大夫鉉山州知州兼勸農事歲大饑出祿米百五斛倡大家賑之和者至萬石人詠歌不能忘閒居樹藝方為歲晚計而溘爾長往可勝嘆哉得年六十有三夫人文肅女恭儉柔懿相家於成初文肅與澤州公同在樞幕愛其淳慎而女焉文肅老子弟果能相其營葬而經理其家二子長觀音奴八歲弟甫兩月一女馬緒妻也噫人有死雖同而有不同者或牀笄曠歲竟亦不免生者無悔逝者毒焉或遺世食頃生者不及進一劑之拯留恨無極



近者安焉是蓋得於天之不同而或者遂謂此愈於彼豈理也哉  
惟正命全歸聖人所取其庶幾乎二氏為宏勝誕夸嘗預告人以  
聳動愚俗而靜修之士原始反終亦有前知而不亂者如利甫者  
其知乎方校資格有望將來其不知乎告言醜縷若將有託焉者  
何也豈動乎四體有不能自己者乎其知不知予不知也獨悲夫族  
屬至親無一在側而予叫呼救療雖終無益而區區之心亦勞矣  
其偶然乎其亦彼有遇乎如有所遇也則予之銘之也不容辭矣  
銘曰  
有齡匪鮮六十又三有官不卑守爵是儻為薪火傳則二斯男疾  
恒楚極逝乃笑談馮生芸芸及時斯可緒使狂奔躅石途左豈其自  
知告言瑣瑣猶針投芥銘實在我我銘孔昭宅幽諧卜利爾後人  
以似以續

至正集卷第五十四終

至正集卷第五十五

碑志十二

教諭王孝卿墓碣銘

武鄉王誠從余游一日出行實致其兄進之言曰進兄弟不肖而  
得忝願士類以自異於鄉民市商肆工者親之教也先人德善不  
可誣恐久遂泯重進不孝敢以為請按王氏家沁州武鄉縣長樂  
里曰現當金末從軍有官勳子興參元帥杜公幕次日信善治生  
家以不窶信娶元氏生忠字孝卿進父也孝卿早失父元氏誓志  
秉節督家人力田桑躬治絲枲平居毫釐不輕出至延師待賓則  
豁然不復靳儀範姻族孝卿性穎悟力學不倦土俗當冬隙羣居  
終夜斷麻取膚孝卿以膏火不繼焚麻取光且斷且誦自餘手不  
廢卷經史百家靡不研究下逮陰陽方技佛老之言亦致通焉事

至正集卷第五十五

碑志十二

五十三



母盡子職族無遠近歲時交歡物禮俱至隱居教授執業滿堂郡博士知其賢辟為邑教諭令邑民皆得矜式雖孝卿亦自喜將階是以發其光也大德辛丑元氏年六十七以病終孝卿克致其哀明年妻焦氏亦殞上無恃下無助又二十年迺卒得歲四十有八葬西山先塋子三人進其長也初孝卿之喪母也奠祭一準文公禮不用浮屠不恤旁議進之喪父也恪遵遺訓有嚴無替治家儉勤遂致饒益視昔倍百立祠華不逾制而時祭盡禮曰德曰義皆孝弟克家祭統為銘者一稱而上下皆得焉進之知此學力也可不知教其子乎是可銘也銘曰  
王氏右族翁闈替隆有居沁鄙樹德惟崇帝降而祥匪金匪珠俾生子為儒以華以腴翁也早殖但聞其嗶母也拮据竟玉于成嗚呼孝卿生得母以為賢子死有子以為賢父雖死猶生

蘄黃宣慰使答公夫人田氏墓志銘

夫人姓田氏利路西和州長樂人故四川安撫使德實季女正議大夫兵部尚書蘄黃等處宣慰使答德威妻田氏右族曾高上俱以武功為宋顯官夫人及笄歸宣慰舅湖廣行省左丞治家嚴夫人相宣慰以能婦稱宣慰早卒子榮甫一歲不以焚斃子而專於慈推世賞於諸子俾為學以世其家治家以勤老而明健談往事歷歷可聽女紅一日不去手至順四年八月十四日卒於武昌之地享年九十一女一人適趙植孫男二人先進先昇女二人先惠適鄭文監先熹未嫁以年月日附公安先塋文監致其外舅榮之狀請曰咎門欲傾而支絕而續者母力也痛念冲愚先子德善多逸吾母居孀五十年節義炳炳忍復湮沒幸哀而志其壙夫人女公卿家夫在而能婦夫沒而能母執德秉義天昌其壽子



且五十而諸孫亦訖訖矣予因有以見為善之多獲也法三十前夫七六十後不嫁表厥宅里脫不幸逾三十賢者固不敢誣凡庸之情念法已不與去耄尚遠遂分不齒予嘗切概與善之狹也然法不局則冒有志於風教者亦究其本何如爾夫人守節五十年凜凜然在世者固不係乎表之有無也銘曰  
有營之豐有殖之蕃嗟未亡人苦可飫温彼呱者孤不季不昆茫茫百年敢予固存慮勝而往校利而奔彼市道交天叙有悖天厚其報將百斯孫我銘其幽永思弗諼

贈承務郎天臨路同知湘潭州事朱君墓碣銘

君諱士心字奎仲姓朱氏世為湘鄉人曾大父用舟大父應龍宋進士父斌以子玉誠貴贈從仕郎潭州路安化縣尹配周氏贈宜人君生宋嘉祐庚戌卒延祐己未至治辛酉十二月二十三日葬

七都益井之原娶袁氏繼陶氏子合班秩承務郎武昌路蒲圻縣尹兼勸農事君贈承務郎天臨路同知湘潭州事袁氏贈恭人合班欲揭之所屬銘惟懋嘉乃為親而筆之君為童不喜弄性恬淡諸弟絡繹入仕徙居湖山獨事樹藝事安化君不少違左右作童稚狀曲意承懽安化君年八十五卒君六十七矣哀毀踰少壯友五弟怡怡分田取其硯器取其藥壽七十子四孫二十二生為孝弟人沒追榮六品子曰璣曰琪曰瑾琪瑾出陶氏合班則璣琪瑾之兄袁氏出也通國語積勞譯掾為今官賢而能政者也予見大家類喜官而鮮克由其道惟貨是求得亦失之是猶作壩而不堅其址植幹一釋仆不旋踵爾安化君父子積善於躬而合班投足正途不徑不竇以底於成蓋植於前而實於後也然予聞黃太史言吾儕衣冠而仕豈己力哉皆自高曾以來積累偶然冲和之氣在此



一枝爾嗚呼世之自以為能而秦越其族者亦回視其始之一本乎亦推其原之所發而偶然在我乎予竊有慨於世而重有望於合班者又將遠其澤於方至也銘曰  
人不愧天天不遠人彼難之獲惟致之馴熄而有光邈而益振賚思蠶蛹由葉溉根不蓄何畬不耕何獲吾蓄吾耕匪今而昨天昌其門流慶未已椒蕃瓜繇子孫孫子鹽井之原鳳山直焉匪山而人後其勗旃

副使譚生甫墓碣銘

南陽書院山長廖則逢嘗數寧鄉極稱邑人譚生甫賢狀其行請曰世達官聞人則逢不及識而識者山林中人也子名喜善達官聞人豈得專子之銘敢致其子朝貴意徼銘其阡予閱其意遂從而叙之生甫名應發吏部端潔公後早事鈔掣作稅官不樂棄去

為人踈絕好賓客娶易氏生男朝榮女懿真易氏卒葬萬善里荷擘塘生甫壽五十卒莫溫泉鄉景龍里朝榮懿真既婚嫁相繼卒朝貴奉李氏子朝榮未生生甫養為嗣泰定丙寅遷景龍之墓於烏江建廟立祠割田以奉祀事邑庠摧圮獨作禮殿學庠不充割膏腴百畝入之歲歉發廩捐直且飲食來者徒李氏瑩佳地教其子姪晚乃舉四子此其狀大較也予聞楚俗鬼殫財土木事非其事名教所出職者且不知恤况非其職而傾財力任者乎寸土一木訟結累歲况百畝乎歲歉開廩騰直乘時為富則損直而又飲食之不明乎義而能之乎可謂善變其俗者已世有為此必聞諸官而表厥宅里朝貴則力拒之然而人之稱以義者不戒而一樂善之天人心之同然也使世有君子將出亦必不靳而與之此聖人與人為善之盛心也其後譚也勞筋力以立其家養生送死以



答其德者固已無愧若夫泝其源沿其流則朝貴之義又有大於  
是者焉予銘生甫而詳朝貴者所以右譚也銘曰

應發名生甫字世寧鄉譚其氏藐督征屣俱棄積軼材顧厥肆生  
丙辰卒乙巳鬱多美李乃嗣義之實善攸取細克充大斯舉江有  
沱沂回室馴弗安沅則釋我為銘理不忒本支百視此石

故進義副尉元氏縣主簿馬君墓碣銘

君諱顯姓馬氏世為遼山人祖罹兵亂莫詳所出至旺娶李氏生  
君君少孤有志節形質魁碩不妄語笑見危難急如在己 聖朝  
既平金平陽太原郡各一王遼山和順故隸平陽與太原接壤守  
臣主彼者率其徒劫二縣民籍之民從違相半遂自為敵日千百  
闖擊君甚不平謂衆曰 聖天子既定封民各有屬此王之民  
而為彼戶可乎錄其版白諸府府畏忌不果行會滅薛二輩行斷

事官往訴其狀尋奏復之因檄君為和順令至則興滯補弊安輯  
流散民甚德之在官十年治最一路業速普化王嗣封與語嘉之  
佩以銀符衣以錦襖一感紋繡靴一隻銀五十兩至元己巳調天  
下官君自以治蹟不下任其銓授除榆次主簿君受命曰令與簿  
雖有高下職王事則一也欣然赴之秩滿陞進義副尉保德州判  
官民女有貧不克嫁者出俸資之戰骨蔽野為大塚收葬之移元  
氏主簿丙子歲五月十三日卒於官得年七十九皇慶癸丑始祔  
於四里堠塋娶趙氏子八人長同其母趙兵亂相失次天牧天翼  
天羽為儀曹掾卒天祥天佐天輔天祐皆謹愿克家女二人適周氏  
孫曾四十人於戲君逃難孑遺而能卓然有立歷官盡忠若子若  
孫蕃衍若是安知他日無挺挺高出其先者乎銘曰  
位奚崇卑克稱斯榮事靡難易惟志竟成匹夫崛起而能回事之



難者以為易處位之卑也而如崇是知非齊民之流名豈與死而相從伊農昏勞有秋其豐植本其茂支百是叢堅砥表汗遠君休於無窮

廣西憲史熊君墓碣銘

廣西廉史熊君諱文煥字用晦致和戊辰六月六日卒十一月二日祔江夏西興鄉長樂村先塋其弟文焰介相陰通守納璘普華致其父克昭之辭曰我家三世業儒祖澤是賴有子五人仲子文煥讀書入仕矣乃先我而逝我哀其慧而夭也思有以異衆人之漸盡泯滅者且昔嘗拜子金陵文而碣之則衰朽鞠子之哀得以自舒矣蓋予至治壬戌承乏御史而君為湖南奏差南臺控十道俾來絡繹一人接對能不立判時已多其敏捷而期其可遠也而止於斯耶君先世居鄖曾祖諱天錫宋寶祐己未省試第一人祖

諱季永咸淳丙寅補太學上舍始遷武昌克昭為歸州巴東教諭配劉氏君在昆季間文采郁然積勞湖北憲及格為奏差尋遷湖南陞書吏遷廣西以疾歸遂不起年三十有五娶李氏一子慶孫選格出官多途拔清貴速化者科舉下即曰憲屬一為憲吏則迤邐至中書掾出身第六品其不至者班資雖卑亦變化易反手謂其風紀已試無施不可也然路貢儒吏府州拔胥史百間一得又有捺觚憲司服勤執役不知幾年始與班祿又不知幾年而為奏差而陞書吏得惟艱哉慮居久人狎則兩道易遷從使者繩糾郡邑望風若畏死居下威權故疾之者衆朝議屢變選補法至其權則勢不能輕之也但歲以御史覆其迹而去留之君廉介稱於人人不疾之御史不去之可謂適用之才已夫以適用之才服艱得之役當方剛之年有垂白之親而一旦妖卒於序天之在冥冥者果



何如哉聞者哀之况識者乎識者哀之况父母兄弟妻子乎故系之銘曰  
寒爾衣飢爾食鑿爾愚充爾質爾祿我養我門爾高弗養非高天乎劬勞豈爾愛親喜懼異常而適於亡於庫百世而卜曰此熊君之藏孰不爾傷

贈中憲大夫河東山西道宣慰副使紐公墓表

聖朝孝治天下錫有位以及其親是與人為善也人有殫刑不率而格於不僂之僂者蓋有以觸其為善之機焉至大中始行封贈推恩世數視職崇卑有司不謹三格始復 皇上率舊諭飭周詳久可不獎幽而泉壤昭而家庭存沒均洽其或不慎則舉而委諸掌故之藏人非喪心鮮不自勵勸懲之道於是兩盡余甫冠知河東紐公賢致和戊辰會於江夏則已休致矣一日謂曰克讓結髮

靈仕辛勤四十年先人中憲公既疏縣封日愈恪慎懼或失墜今弛擔世途吾知免矣而先人又進郡封不表之阡則君親之德不才保守之難吾子孫藐乎其不知也子可無為我筆之夫自封典一行姦貪且為循廉矧素賢者其益進於忠益顯其親宜哉惟紐氏在後周有曰因者暨子士雄俱以孝稱他無見焉晉有鈕滔吳興人豈紐轉為鈕若鞠之為趨乎紐今著郡吳興豈滔亦其先耶世遠譜亡莫詳所出有居汾州之孝義者族大以蕃至用始遷介休生中憲公諱文敦厚樂易教子以禮嘗曰吾無過人者循理安分使鄉閭稱善良差可無愧用是沒齒志願畢矣至元乙酉六月日卒於家享年五十九葬城西先塋克讓守龍陽贈奉議大夫冀寧路總管府治中驍騎尉追封介休縣子配王氏介休縣君克讓以中憲大夫湖南宣慰副使致仕加贈中憲大夫河東山西道



宣慰副使上騎都尉追封汾陽郡伯縣君進汾陽郡君三子長克恭李克忠克讓其次也為掾廉為理幕賑湖南飢活人多雪雷州李妙生三人寬賞一資岳武昌皆劇郡為推官用法平恕其去龍陽也州人紀之碑娶陳繼張封皆郡君嗟乎孝其親則思榮其親孝則在己榮則在君克讓兩及其親卒完晚節不孤 聖朝與人為善之至意矣余故併叙其說俾後裔皆有感焉孫十人曰端者方世其祿銘曰

古士所事皆竭能致惟行之恒非率亦至世不古趨率之始行昧厥宜有謂賢謂能伊率之久而格之多一機混融八荒太和彼紐有子在汾之澍視成敬然允示繩祖

至正集卷第五十五終

至正集卷第五十六

碑志十三

李氏新塋碣銘

李氏自宋塋邢之堯山東侯里徙西侯里地復無隙泰定甲子其後曰之芳者即塋東一里而別營兆域焉遷其祖考新其封樹蓋將倡百世而再始於斯也其友孔君嘉甫以書致之芳語曰先世由宋歷金不去鄉土雖陵谷變遷譜次莫究而兩塋之內列封秩如樵牧無擾今隙不容竄義當改卜近而可究者自吾祖主簿始不有紀之後世子孫不知兩塋之累累者皆吾先也嘉甫故人也之芳子曰祚者昔嘗識之乃為之叙曰主簿諱進仕唐山縣三載恩信決人娶石氏復盡內助用大其家子天祿中統初勸農司檄為屬官督邢民之不昏作勞者職卑而能盡其事一子即之芳親

至正集卷第五十六

碑志十三

六十



志未終者舉為之早以孝聞優游田里祿為太學生仕有日矣亦浩然歸養親治生雍雍如也噫人之生於世也時有否泰家有盛衰或斷嗣續或散四方世守邱壟王侯有所不獲聖人有不知其墓者况齊民乎李氏之塋滿至遷遷至再而不失其始可謂盛矣故系之云

李本實繁有植在邢不樞不翳支百其榮惟是幽宮瑞慶攸並若泉盈科導之益清邇不紊叙遐不殊鄉松楸如雲鬱其相望嗟江之南忘親誅利遼或千里迷不再世我我堯峯綿綿來裔視此歌詩有永無替

贈僉太常禮儀院事驀克篤公神道碑銘

河間總管萬嘉閔貽書有士曰先子太常公長千夫戍閩海而卒其不孝孤席世德致顯榮既疏封矣辱知我深且樂銘人善者獨

子爾道不孝焯世德者子忍我拒哉有士固樂銘人善而非能辭者也夙交最歡而相期以遠獨吾二人則是銘宜我屬也乃序而銘之序曰太常公諱驀克篤蒙古耐溫台氏大父諱某國初以材武扈戰隸右手萬戶駐廣平因家焉父諱忽珊驍勇善戰從討李壇身冒矢石俘七人詢知為所驅市人即釋歸使語其黨曰朝廷誅止首惡脅從罔治無淪胥以止賊聞者多解體鄂渚襄樊之役皆著功從攻廣西創劇不能甲遣子閻闕未代行戰死靜江移師江右復遣其季黑山戰於洪又死焉平生百戰癡殆被體而未嘗妄殺壽八十三而終以總管貴贈中順大夫同僉樞密院事上騎都尉追封范陽郡伯配欽察氏生閻闕未葉氏生公及黑山皆追封范陽郡君公勇肖僉樞先登陷敵視死不驚為大帥阿朮公器重宋平以功授右衛親軍百戶達魯花赤階敷武校尉佩銀符多志數



善營造方築都城穿漕渠指畫督役人與其能乃顏之叛扈戰有功  
陞福州親軍千戶達魯花赤階忠翊校尉佩金符戍興化軍民咸  
德之至大庚戌九月十二日卒於戍壽五十七明年二月葬廣平  
曲周縣 之原贈武德將軍同知廣平路總管府事驍騎尉曲  
周縣子再贈中順大夫同僉樞密院事輕車都尉范陽郡伯三贈  
亞中大夫僉太常禮儀院事上輕車都尉追封范陽郡侯配欽察  
氏追封范陽郡太夫人二子長總管也起家山北照磨遂讓世爵  
於弟懋御史西臺中臺僉副各道同僉中政院事戶部浙省正郎  
貳茶漕入為戶部侍郎改內宰尋除今官階嘉議大夫所至有稱  
次那海襲世爵以薦陞江浙行省都鎮撫樞密斷事官今鎮江上  
萬戶達魯花赤階大中大夫孫男四人壽安永安定安寧安女六  
人脫脫泥也速倫瑣奴適國子生完者溥化延福提舉邁兀答兒

太祝王敏行觀音奴潤奴徹徹倫未行女弟元奴適右衛千戶達  
魯花赤佛奴生子海直登延祐辛酉進士第公束髮行伍累積戰  
勞至荷符節顯其先而開厥後兄弟皆殉國子然養父竭力致樂  
在衛迎母就養以孝聞兄子閻馬女鍊木倫教養而室家之雅尚儒  
術延名士以教其子故伯也以才諳亢厥宗仲也以篤慎世其祿  
流慶所及甥海直亦以科第顯嗚呼士子一登仕即捐其故習遑  
恤其後哉而教以鮮卑語事公卿為要道者在所不論也公出兜  
鍔而貽謀之方不以彼而以此其可訓也夫銘曰  
天造朔易材武惟家及常厥邑遂移于華強力攬攘浥波蹄涔導  
源詩書猶海之深子其佔畢我則服弭嗟我不及盍及我子朱幡  
隼旗實為甸侯崇居不寧恪乃聿修疏封范陽報若合符匪曰我  
能乃慶之餘宜爾後昆世濟其德永言孝思視此銘刻



故資善大夫輔義公陳公神道碑銘

輔義公安南陳公薨五十年猶子正議大夫清化府路宣撫使德潤以公蒞漢陽城西馬湖地湫且隘購得善地於鳳棲山至元後戊寅十一月吉日遂更葬焉狀其行請曰先世父拔身安南竭誠內附世祖皇帝灼其忠蓋爵以上公優以祿賜圖報未究天嗇其壽而又無子也銘其善使有聞不在德潤乎請既切乃筆之曰安南坊見虞書漢唐皆郡邑之唐末為曲顛所據更數姓至李傳世差久至龍翰不振為眾叛所圍出奔歸化江外戚陳勝與從弟審起鄉兵平亂龍翰復國勝以功官太尉審封快路侯龍翰卒子吳昂嗣以女昭聖妻勝子日照吳昂卒昭聖嗣位踰年遜位於其夫陳氏遂有國追號勝為太祖審為安國王審子肅敬為武道王武道娶程氏生三子長即公也諱秀煖其國封文義侯

世

皇既平雲南大帥兀良合解統師出邕桂道安南境將會大兵於鄂日照懼更名光炳納款於我光炳卒子日烜不請自立召入覲以疾辭再召始遣從叔遺愛代朝制封遺愛安南國王命莊椿帥師送就國日烜不奉詔廢遺愛為庶人朝廷有事占城假道安南諭使給饗又不聽鎮南王以大軍壓境日烜守要害拒戰屢敗之王渡江受俘於其宮公昆弟請於武道曰聖元龍興萬國臣妾我家昧畏天之義抗拒王師與其覆宗社而糜爛其民孰若轉禍為福抱祭器以存先祠乎武道從之遂降進李女於王後生宗王日烜弟益稷亦率其屬降公奉父母北遷次邕州武道卒公從益稷入見封益稷為安南國王封公輔義公官資善大夫佩金虎符其屬授擢有差後復有事安南賜公弓矢從鎮南王還其國公以疾留來賓我師破羅城日烜遁王以暑潦班師公從歸子嘉議大



夫義安府路宣撫使德漸卒於全州詔公居漢陽至元二十四年五月以疾卒享年 娶田氏弟二人大嚙其國封明誠侯妻黎氏生德潤嶽封明智侯皆先卒余聞昔人言交州多南金象犀其產皆竒恠而草木亦殊異疑陽德之炳耀獨發於是物而罕鍾乎人公生絕微嗜學不減華人有萃山吟藁辭多悲壯豈非鍾陽德之炳耀者耶不獨詩也君子所以異於人者以其知天命而識時務也昔呂嘉相越逆命路博德帥師進討身與越俱亡公所得視嘉不既多矣乎然自出疆族黨凋落親殞未啟嗣子弗天故見於詩者其鳴不能不悲也苟有繼其志而述其事者其悲可以已矣德潤痛世父之無後而懼其無聞也卜厝有地顯揚有石植祠墓側省拜以時可謂猶子矣銘曰

南交毓材有離其倫天誘其喪入為我臣何遠弗柔點蒼既勒光炳効順有章其節爰及子烜乃敢不庭帝赫斯怒我師有征公其懿親謀也能淑匪亢厥宗實舉其覆帝曰咨汝汝公汝玉居之漢濱以蒸以膏嗟嗟輔義甚禮而文踰越萬里流離一身胡導其來不昌其年孰啟孰完猶子有賢滔滔江漢鬱鬱松柏鳳棲之原永奠幽宅

司獄杜君墓志銘

先公在鄉校時獲拜緱山杜先生手錄其詩挾之游江南有壬總角嘗受讀焉承乏叅議中書先生曾孫秉彝實掾東曹先生薨有壬歸鄉里始納交秉彝父愚情誼尤篤至正壬午九月丙戌秉彝弟秉鈞卒於京師秉彝哭之幾絕哭已請曰吾弟公契家子也歸葬有日非公之銘則何以釋吾父之哀而灼吾弟之善乎有壬知其世為詳交其父又久且深其誰宜銘秉鈞字德維安陽人曾大



父諱瑛贈翰林學士追封魏郡公謚文獻緱山先生也大父諱處  
愿東昌路推官父愚以子貴封亞中大夫彰德路總管京兆郡侯  
母曹氏京兆郡夫人為人和易與物無競由是賞歷監當陞九品  
流官除彰德路司獄以明恕聞春官辟為掾疾弗克赴命再下駟  
次涿州疾抵京謂其兄曰吾忍死見兄若可無恨然負吾翁矣醫  
療百至竟弗起得年四十二配林氏生子伴叔年十五卒繼師氏  
生女亦早卒弟四人秉直秉容秉一秉德嗚呼父母俱存兄弟無  
故一樂也父貴而壽康兄兩拜御史四僉司憲今中書左司都事  
為時聞人而公發軔啟歷駸駸乎繼踵矣孰謂天之可必者竟不  
可必耶壽天命也仁者必有後理也今乃若是耶余之銘灼君之  
善矣其能已兄之慟乎兄之慟已矣其能已翁之慟乎若夫君之  
善灼矣則翁之慟可以已矣於是乎銘銘曰

有材斯萌將以為棟楹侯植而樞侯栽而傾曷慰其翁曷寧其兄  
太空冥冥吾不得而名吾以為為杜氏之銘

故朝請大夫山南湖北道提刑按察副使梁公神道碑銘

黃嚴知州梁廷奉其祖考山南湖北道提刑按察副使公行實請  
曰先祖學積於躬孝聞於鄉忠著於官葬歷三紀而墓碑未刻敢  
告有壬辱與公同里聞聞長老稱公甚習竊有慕焉凡鄉先生一  
言一行固當搜攬撮拾為淑人計况銘公乎廷之請其敢辭公諱  
貞字幹臣彰德安陽人曾祖考諱立妣張氏祖諱滄妣石氏考諱  
璧善居貨客有持金鍍銀貿物者直以為銀斷視之乃金也追而  
歸之其信義類此少力學值金未弗克卒業而里行家法鄉間是  
則嘗戒諸子曰學所以為人子為人臣也我生不辰有志不就汝  
輩能繼我志非特為孝子將不為忠臣乎公倡諸弟篤勵進修中統



庚申大名宣撫使司推擇為左司知管明年轉中書左三部提控  
令史聞文疾六日馳千二百里至家已弗及毀瘠廬墓部符三至  
督起力請終制知不可奪乃檄郡加優典以勵風俗服闋授濟源  
縣尹始入境從者求田婦所負之水飲焉婦難之公詰其故婦對  
地素艱水公曰吾無擾於民而馬先飲其水其可乃縱馬聽其所  
止馬前蹠地以待因識之既視事鑿其地得泉甘冽民為立祠號  
梁公井境有濟瀆祠謁禱絡繹民罷於奔命公毅然曰禱神而擾  
人奚福之有悉拒絕之貢尚醞米故事貳政部輸郡以付公民勸  
公辯公曰就可福民何為而辭他邑以適耗重責於民公獨挈羸  
以歸趙成詐虎食其牛乞蠲徭役公戚然曰今不善之所致也償  
其價未幾虎斃於叢祠敦本抑末禁姦戢暴力田務蠶條以諭之  
勸善懲惡歲以勉之立鄉校設師弟子員集孝弟節義等事使讀

者有所興起三年間笞罰止二十七人蝗被河朔獨不入境歉周  
隣郡邑乃告豐文正許公兩薦公於朝時廷議治最者二人郡則  
衛輝陳侯縣則公文未歲終以疾去邑人思而紀之碑至元戊辰  
始立御史臺 上御廣寒殿召拜監察御史官承事郎遇事輒言  
不事苛察不畏強禦凡建明平反彈擊皆犁然有當於人心者八  
年陞承務郎遥授中山府判官行河南等路行尚書省都事時有  
事襄樊贊謨給饒公力居多十一年授承直郎代州知州為治一  
視濟源而節目加詳司徒五教周禮六德六行之訓與夫先正格  
言而家喻而戶曉之勸桑農以豐衣食之本牧犧羊以供徭役之  
需引滹沱而澆瘠之地以饒正婚禮而論財之俗以革禁火葬而  
送終之禮以厚部使者薦剋沓上聲譽大振十四年擢奉議大夫  
江北淮東道提刑按察副使行省有戾於法者未踰月而三劾之



同列懷懼公處之裕如也十八年三月移山南湖北道階朝請大夫至是凡六居官三以母老辭不允躬請行臺始克歸養二十二年太夫人史氏年八十平公既免喪遂不出大德十一年九月六日終於正寢年七十有九十一月某日祔郭村先塋弟桂楫榎樞配張氏先卒子男一莊女一適蓋某孫男二長達早世次廷也女三曾孫男女若干有士述公之行因有以見中統至元之治焉治不在法而在於人官不在地而在於行臺之始立慎簡至矣一令之賢廷見擢授非以素歷風紀而取也及其見諸事業猶輕車之就熟路何哉用得其人而人有其蓄隨其地措之爾公為御史治效已著乃出為行省底僚又三年始守一州又三年乃有淮東按察副使之命未聞以久居朝廷為榮而亦未聞以風紀復官有司為辱也選格之通融世風之渾厚於此可見矣自今視昔豈不大

相柄鑿乎有士傷今而思昔而又有疑於昔焉盛世多材固不乏用公喪母時年甫五十有七至其終也家居凡二十三年獨非遺賢乎使盡其用姑以休致為期則十餘年中其所設施不有倍蓰於已試六轉者乎然則廉頑敦薄於風俗蓋有補焉漏盡夜行亦有所警矣高風勁節豈但儀範鄉里而已哉諸孫誵誵而廷方出守名郡慶源日浚矣銘曰

相有孝子出為忠臣官而蹇蹇家而恂恂彼有捧檄匪親而躬聞呼走承強有弗從板蕩餘民禮義何居火親財婚田荒畜藎陳條具約三申五令爰格其心是曰予政九重面擢多冠斯峩我行無事不暴不苛水能潤物豈局故地導之而行何往不利于邑于州或省或憲安其所遇有蘊隨見惟是寸草欲報春暉爾不我從我惟有歸昔翁不及毋豈容再怡愉考終生死禮備人生此世此外



何物悠悠素心皎皎空谷  
侯樵侯漁雍容二紀世豈忘公天寶成  
美我思君子志一時殊勗哉後昆世德其符

至正集卷第五十六終

邑後學楊丙秋浦錄



